

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
MAY 7 1940

24

T 3194/4634.85

人物志

廣市一

合邑十城之人上下千餘年山川之所經流  
 不食之以功名顯而至於今茲  
 獻其史冊者百人其他出入中外  
 見於各邑志乘中又幾千人吉  
 交頌者矣夫廣事資庶官而理  
 康其得此大為得者皆可覆而按  
 立於志

吉安府志卷四十一

塔佛大學漢和  
圖書館珍藏印

人物志

庶官一

合廳邑十城之人上下千餘年山川之所鍾毓士  
各奮起以功名顯由晉而來至於今位列庶職勲  
猷光史冊者數百人其他出入中外能效一官散  
見於各邑志乘中又幾千人吉郡人才可謂名實  
交稱者矣夫庶事資庶官而理庶官惟和庶事用  
康其得詮次為傳者皆可覆而按也立庶官志

晉

修肅

南北朝

劉喬

唐

龍况

南唐

周彬 郭鵬 蕭儼 歐陽廣 蕭結

蕭瓚 歐陽柳 胡盛

宋

王克貞 劉德言 劉茂中 曾文昭 尹承諤

龍錫子暹孫德厚附 張景休 歐陽載 尹絳

蕭定基 歐陽觀 歐陽穎 歐陽曙 毛應全

楊伍 蔣賁 羅覺 劉瑾 嚴震一

胡衍 曾朝陽曾雥合傳 蕭汝諧 蕭汝士

毛君卿 嚴顥 蕭渤 蕭服 蕭世京子拱

辰叙辰附 蕭佐 蕭价 蕭世範 郭知微

蕭良肱 蕭國鎮 羅審理 張汝賢 劉顯

左書言 梁俊 郭履泰 高文中 楊存

彭淳 劉章 王廷彦 張汝明 葛敏修

劉鼎臣 李穀 彭合 曾安中 曾安強

張冕 劉琮 郭允升 郭勁 楊祀

彭從虎 李發 尹躬 李擢 董昌裔

劉獬 吳瓘 彭天順 羅斐恭 梁岳

龍溥 羅上行 李琥 陳干齡 胡鎬

許富 賴之承 董良史 倪師尹 蕭穎

戴之邵 歐陽昂 周因 張廷貴 劉禹錫

張瓘 毛惠直 左慶延 龍時蜚 劉四愚

蕭許 嚴康元 劉令猷 蕭暈 歐陽旻

羅全畧 胡昌齡 羅維藩 曾三聘 孫逢辰

羅克開 王化原 彭堯輔 劉南鵬 張鋼附子

潞州孫脩 劉德禮 戴翊世 曾光祖 胡清臣

劉廷直 王琳 胡棫 張奭 楊長孺

葉之茂 康莊 陳午 解福 李如圭

蕭麟 左暮 周雲 羅晟 張焞

孫鏖 賀昌鳳 羅清憲 劉元剛 左師召

龍升之 胡敬之 胡夢虎 黃登 劉洪範

胡登 劉南甫 劉應美 蕭子蒼 劉奎

劉彥登 李應革 劉顯仁 蕭逢辰 范元鎮

尹四聰 羅德文 王元孫 曾先之 羅惠孺

曾恭甫 王公甫

元

陳先得子學禮合 羅尚志 劉元 蕭天從

楊景行 高若鳳 劉震 周志遠 王仕政

尹希善 劉文德 夏日孜 聶以道 戴邁

劉聞 劉性 龍光庭 劉桂平 李復登

胡希仁 謝起周 楊升雲 蕭泰登 謝維斗  
羅文節 蕭 諶 吳思尹 蕭文孫 歐陽永  
韓夢臣 劉中孚 劉本泉 蕭顯聞

晉

修肅廬陵人為典書令懷帝始立為皇太弟懼不自安肅  
曰二相經營王室志寧社稷儲貳之重宜歸時望親賢  
之舉非大王而誰清河幼弱未允衆心今乘輿播越二  
宮久曠宜及時登儲副帝曰卿吾宋昌也從之 通志  
按縣志修肅姓宋查一統志亦無宋字通志據晉書  
從之

南北朝

劉喬安福人安成王右常侍以賢能稱歿江淹有辭誄之

縣志

唐

龍况字景荀永新人光啟間任大理評事居官仁廉歿遇  
異僧卜葬義山鹽堆子五人咸以科名顯號鹽堆龍 縣志  
按龍况傳載其先鉅鹿人祖庚天祐中任茶陵令今  
查天祐距光啟後二十年當無孫先二十年出仕而  
祖反後二十年始為令者又唐時鄉舉無入官之條  
縣志傳文皆不確故皆截之

五代南唐

周彬禾川人杜門讀書不治產業其妻曰君家兄弟皆力

田致豐而獨玩故紙以自困耶彬笑曰耕田不如耕道  
 聞烈祖鎮金陵招辟儒生彬因獻所習烈祖善之禪代  
 之後有事南郊彬著郊望論數千言廣陳前古得失上  
 之署諸衛巡官授大理司直以母憂歸葬服闋詣建康  
 以前官出宰禾川為政廉平鄉里率化秩滿邑人詣郡  
 乞留連任七考累遷尚書郎卒於官

補馬令南唐書參通志

通志按云白志引寰宇記謂唐顯慶四年永新民以  
 太和道遠請別置縣於禾山禾川之名當在此時南  
 唐仍而不改故彬為禾川人即今太和縣也考唐書  
 地理志武德五年置南平州并永新廣興東昌三縣  
 八年州廢省永新等縣入太和顯慶二年復析太和

置永新永新別為縣不應仍屬泰和至四年又以道  
 遠請別置縣也且唐志并無禾川縣名俟再考又安  
 志云彬宰本邑時有爭訟者以理和解嗣主錫以銀  
 章茜綬寵異之官至尚書郎

郭鵬永新人南唐開科取士鵬中第為廬陵令尋轉大理  
 屬官與大理卿蕭儼同決疑獄按南平王鍾傳夫人奸  
 事人服其果斷

通志

通志按云劉文安公永新人物志所載多本邑人間  
 有林志豫章書所不載者如郭胡二人是也今胡元  
 龜入文苑傳中

蕭儼廬陵人甫十歲以童子擢第及長授秘書省正字烈

祖初遷大理司直拜刑部郎中元宗即位委政齊王景  
遂儼上書極論乃出聽政馮延魯等矯遺制許民私賣  
己子儼駁曰此非大行之命延魯矯為之爾昔延魯為  
東都判官上疏貧民不自給者聽鬻己子大行問臣臣  
曰往者陛下出府金以贖民子故得天下歸心若許民  
賣子以資豪民非防微之道延魯今欲復行之故知其  
矯先旨也遷大理卿兼給事中因斷獄失入貶南昌令  
俄復舊官後主初嗣位屢與嬖倖對奕儼入白事舉奩  
投於地後主大怒曰汝與魏徵孰愈儼從容曰臣非魏  
徵陛下亦非太宗矣後主默然罷奕儼秉身方直彈奏  
不可百官貴戚斂衽避之南唐亡以老病歸鄉里卒年

七十餘

摘馬令南唐書參通志

歐陽廣吉水人保大中詣闕上書言武安節度使邊鎬非  
將才兵乘夜呼噪共焚譙門仁不足惠下圖桂林以取  
奔敗智不足謀遠與監軍不相協和動輒疑阻義不足  
和衆幕府無賢才禮不足得士號令朝出夕改信不足  
使人五者無一長必失湖南請擇帥濟師以全境土書  
入不省已而劉言襲鎬據之唐主思廣言命授以官執  
政請召試廣不就乃授本縣令亦不受而卒

摘陸游南唐書參林

蕭結廬陵人為祁陽令潔已愛民志移澆俗時方暮春州  
符下取船競渡結批曰秧開五葉蠶長三眠人皆忙迫



划甚閒船州守為罷競渡 通志

通志按云蕭結舊志不載今采一統志湖廣名宦補入又湖廣志列入五代歐陽史職方考云自江以下二十一州屬南唐結應為南唐人

蕭瓚字君玉泰和人官至國子祭酒幼有至性嘗廬母墓鄉里有爭訟詣瓚不直者聞風而返過家上塚適處寇犯境瓚率畦丁萬人掩捕畧盡璽書褒美及歿鄉人為

立祠 參通志縣志

歐陽柳字可封廬陵人修曾祖也仕南唐為武昌令吉州軍事衙推官至檢校右散騎常侍兼御史大夫性至孝兄弟相友愛有紫芝一莖兩葩生於楹鄉人以為孝德

所感為著賦頌年九十四葬歐桂里橫溪之鷺湖贈太師中書令 通志

按世次碑歐陽偃始居沙溪則當柳時所居尚在廬陵可知通志改柳為永豐人非是

胡盛廬陵人南唐時避地宜春官至殿中侍御史 採人物表增

宋

王克貞字守節廬陵人南唐進士歸宋授太子中允知漢州以文學受知太宗與張洎同為誥命典正預修太平廣記總類歷滑襄梓三州皆有善政史臣謂優於張洎云

劉德言安福人南唐時寇亂德言率良家子弟捍閭里全

活甚衆宋平江南以所統兵歸授文階仕至水部員外郎江南轉運使

劉茂中安福人仕南唐以功授吉州兵馬監押累遷袁州刺史宋平江南茂中至京師太祖問曰卿在江南屢擾邊邑何也茂中對曰臣結髮事主惟忠勇是奮雖陛下親征臣亦殞身不顧太祖壯之授登州刺史

以上通志

通志按云明一統志茂中作忠列入五代無授登州

刺史事

曾文昭廬陵人年七歲應童子舉擢第三事南唐歷官太和令以廉惠稱歸宋改亳州永城令上疏論邑利害省輓船夫力歲以萬計改蒙城遷大理司直雍熙二年卒

贈刑部侍郎

縣志

尹承諤永新人南唐時授本邑制置兵馬監押輯睦將校兵士樂為之用入宋授左侍禁太宗嗣位轉供奉官會計邊運事皆幹濟救巡撫環慶還奏鄭州商稅欺弊因命按治著為令

通志

龍燭

燭一作燭

字琢成永新人乾德中任郴州守仁廉為政時

有羣鶴來翔之異子暹雍熙宏辭科任江州司戶其裔孫德厚起嘉定拔萃科任翰林承旨出守潭州有善政端平間復以舊官召用

縣志

張景休字瑞麟泰和人咸平進士授南陽觀察判官廉潔至公育才薦賢手不釋卷考滿入獻新集數十軸館閣

知名復除荆南戎幕薦者交章遷秘書省著作佐郎除汀州長汀令母艱服闋補武昌崇陽令清白始終如一卒年六十餘

縣志

歐陽載字則之廬陵人

今隸永豐

脩仲父也淳化進士乙科真

宗嘗自擇御史載以秘書丞召見見者數人皆自薦載獨立墀下無所說明日拜監察御史中丞王嗣宗指曰是獨立墀下者真御史也遷殿中侍御史出知泗州先是京師歲旱有浮圖人斷臂禱雨官為起寺於龜山其勢傾動四方又誘民男女投淮水死曰佛之法用此得大利而愚民歲死淮水者幾百人臨溺時用其徒倡呼前後擁之以入至有自悔欲走者呼號不得免載聞之

驚曰害有大於此邪盡捕其徒詰其姦民誅數人遣還鄉里者數百人遂毀其寺轉尚書司封員外郎三司戶部判官六年為廣南東轉運使秩滿以一敝舟還無一海上物以足疾求知江州卒

通志本人文紀畧

尹絳泰和人少好學為文師韓柳景德進士官揚州天長簿改移懷寧為政明敏廉潔吏不敢欺請託不入上官以其勤幹多委按覆著能聲遂監皖口輸納終衡州通

判有文集行於世

縣志參林志

蕭定基字守一廬陵人

別志作吉水

天禧進士累官監察御史

裏行蘄州守王蒙正恃勢責賂誣屬縣長死罪詔定基往治遂正其獄除開封府判官遷侍御史宜州蠻為寇

以定基為廣西安撫蠻不敢動官至淮湘荆湖制置發  
運副使卒贈兵部侍郎通志

按吉水志傳云蜀引江水溉田多少有約成都大豪  
樊氏盜約改一晝夜為六由是他縣歲賂樊氏乃得  
其餘水訟二十年不決漕使屬定基乃親步視水一  
晝夜樊氏之水有餘遂伏罪諸縣得水如故宜州寇  
起以定基為廣西安撫定基馳至問其所以反故乃  
以萬人守要害戒諸將賊至乃擊歸則已蠻不敢動  
仁宗曰邊臣好生事定基如此可召用褒嘉備至  
又通志按云宋史蕭服為廬陵人定基為服之祖林  
志乃別隸吉水今改正查吉水志稱定基封爵廬陵

郡侯實祖居同水鄉五十一都故並載之

歐陽觀字仲賓廬陵人

通志據世次碑偃始居沙溪今隸永豐

與弟贍同登

咸平進士歷泗綿二州推官性仁孝歲時祭祀考妣涕  
泣如初喪治獄明慎矜惻每思求其生後任泰州判官  
卒以子修貴封崇國公通志

按通志按云林志仲賓作仲實訛白志改正崇國事  
實具詳文忠公隴岡阡表中今見藝文志

歐陽穎字孝叔廬陵人

後隸永豐

修叔咸平進士官至尚書職

方郎中歷知岳閩饒等州政務嚴明有威惠年七十三

卒

通志參府志

歐陽暉字日華廬陵人

後隸永豐

為隨州推官治獄之難決者

三十六人奇峯寺僧以奸利致富轉運使命矚籍之僧致白金千兩為饋矚笑而却之曰歲大凶汝有積穀六七萬能盡以輸官賑民則吾不汝籍僧喜諾盡輸之饑民賴以全活知桂陽有爭舟相毆至死者獄久不決矚出囚飲食之獨留一人曰汝持匕以左手今死者傷在右肋此汝殺之明矣囚即服罪歷知黃永二州以都官員外郎致仕 通志

毛應佺字子貞吉水人登祥符元年第嘗知竇州郡在合浦之地多產異物宦其地者往往舳舻銜尾應佺比歸盡室一舟無錙銖餘物後歷虔韶太平州通判卒 通志

楊伍字大中吉水人登祥符八年第授國子博士進尚書

屯田員外郎以廉謹名天下其知康州有治蹟仁宗嘗稱其清謹 縣志 參通志

蔣賁字國華龍泉人天聖進士通判廣信軍有心計嘗募江南船匠造鎖楸船人工物料比舊減省可以興漕運之利杜侵欺之奸歐陽脩奏取其法行之賁通知利病與度支判田況議處出入之數况乃為皇祐會計錄上之後召為三司鹽鐵判官祀鄉賢 通志

羅覺字民先龍泉人景祐甲戌進士以大理寺丞轉殿中丞判廣西軍時宋祁知定州以國士器之還朝首薦其材命下而覺死矣覺之判廣西也以親老憚遠不克就養悒悒不樂踰年而父死竟哀毀卒祀鄉賢 縣志

劉瑾字元忠永新人沆之子第進士為館閣校勘沆亡得  
褒贈知制誥張環草詞語涉譏貶瑾泣涕衰經詣宰相  
自言朝廷為改書命黜環為州瑾亦坐經服入公門罷  
職沒喪不就官丐守墳墓王素為請以申孝子之志詔  
復職遷集賢校理通判睢州為淮南轉運副使召修起  
居注加史館修撰河北運使拜天章閣待制知瀛州改  
鎮廣州與樞密院論戍兵不合改虔州知江州歷秦川  
成德軍卒瑾素有操尚所莅以能稱宋史

按邑志劉瑾嘗築滹沱河竣事不言功

嚴震一名宣泰和人慶歷進士任常州推官克考試官識  
名士錢公輔於糊名易書中人服其藻鑒嘗與王岐公

珪同場屋珪高其議論密為延譽為人持身端潔在官  
薄以自奉推所餘以給族之貧者

胡衍字昭叔秦和人慶歷進士宰真陽嶺南無田之民例  
輸身丁米衍為言於外臺部使以聞適陳執中秉政陳  
知梧州時亦嘗奏及此梧人得免至是朝廷以前例可  
其奏衍性坦率內外洞徹所至以循良稱

曾朝陽永豐人

一作吉水

慶歷間登第為石首令改忠州弟篚

縣志

作匪同登第為南安簿陞龍南令俗尚巫鬼篚嚴令禁

止調信州判官移知玉山宋庠唐介司馬光富弼趙抃  
皆薦篚才可館閣未及用而卒朝陽孫元忠大觀間登  
第所著有春秋歷法論語解周易解等書門人私諡文

節先生

按吉水志另有曾篚傳南安作南城又云賊犯境能以義倡同官力拒之賊退當賞辭不受遷龍南令設學教民民化其德尋改玉山亦以惠稱

蕭汝諧字君俞廬陵人定基子以父任補秘書省校書郎登慶歷第監廣州市舶歲入增百萬彭思永薦其可任臺諫熙寧初輪對十事皆得大體子服別有傳

蕭汝士字君平定基子以父任補官知長汀縣時方行青苗助役法置提舉按行郡縣盡責民所有輸錢於官又歲以數萬緡籍縣之富豪者貧民則不與汝士曰助役之設以民力不均故因貧富以賦財縣有五等版籍在

可按而行之青苗之法以新陳不繼下戶不能自食則利權盡歸富人故令得貸於公儲粟以俟其求可也奈何反病之乎提舉變色曰子欲阻新法乎汝士曰今議法非阻法也力求罷去以上通志

毛君卿字公弼吉水人七歲中宋慶歷童子科執政薦其才上殿敷奏六事皆合上意除知泗州復知建昌軍官至中議大夫人物志

嚴顥字威卿吉水人登皇祐五年第為惠州河源縣令持身以廉邑民惜其去餞以海錯舟行十餘里家人發缶得黃金以告顥即掩缶停舟召餽者還之通志

蕭渤吉州人皇祐中以殿中丞知南雄州精於吏事處煩

劇有餘暇儂智高寇報至急築斗城備之民得無恐在  
事三年庶政畢舉及代攀留不可建祠祀焉通志本廣東名宦志

蕭服字昭甫廬陵人一作吉水元豐進士調望江令治以教化

為本移知高安縣尉獲克盜獄具矣服審其辭疑之且

視其刀室不與刃合頃之而殺人者得囚蓋平民也徙

知康州改親賢宅教授入對論人主聽言之要纚纚數

言徽宗謂有爭臣風奉詔作崇寧備官記帝稱善語

輔臣曰服文辭勁麗宜居翰苑朕愛其鯁諤顧諫官何

可缺此人張商英當國引為吏部員外郎以父老請斬

州宋史

通志按云蕭服豫章書載其所著有接伴遼使語錄

并文集十卷

蕭世京字昌孺龍泉人嘉祐進士為廣東路提舉常平公

事蔡京為戶部尚書平章事矜已自任世京多與之忤

因舉奏蔡京十事京由是銜之罷歸會徽宗於禁中得

世京所上書即擢為吏部員外郎遷廣南東路轉運副

使賜金紫子拱辰提點荆浙銅鐵坑冶鑄錢公事叙辰

江南西路提刑祀鄉賢叅通志

蕭佐字公弼龍泉人嘉祐進士歷宰四邑遷知汀州在信

豐為郡守劉彛所知彛執其手曰君志欲靖民真儒者

事業也論薦之汀儒士鮮少庠序僅有存者佐闢而新

之又斥公田以供廩餼文風丕振通志



蕭价字元卿龍泉人佐從弟嘉祐進士歷知零都石城縣擢知道州筠州為政與民不擾嘗曰吾畏人乃能治人其罷高安也不載一物歸人慕其清縣志

蕭世範字治藩龍泉人嘉祐進士為南雄推官憫運夫之苦始制小車以代之一車可勝數人之載公私稱便改廣西轉運判官以恩信示蠻獠蠻亦悅信之通志

郭知微字介卿龍泉人元豐一作治平進士授桂陽令三年無

警去官民常思之後峒民嘯聚當路撫之曰使郭知微再來吾即歸附時知微已卒遣其子登仕郎獬至峒民乃散通志

蕭良肱泰和人為虔州理掾虔化縣捕獲克寇二十五人

良肱為雪其無罪者九人薦克三法司直官終廣東檢法官宣教郎縣志

蕭國鎮字安國泰和人五舉中第任臨川幕官適五羊上供銀銅過郡太守許亢密得十五卒盜銀者以付國鎮曰是有賞格宜盡心國鎮核實皆有生理獄上亢怒國鎮曰情法如此忍以十五人命資一已利乎亢愈怒竟劾奏上嘉國鎮用法平恕十五卒得不死陞衡州倅歷柳州守以朝奉郎致仕縣志

羅審理邑志作禮字安行龍泉人熙寧進士宰太康疏濬康溝

溉田萬餘畝歲饑發倉賑貸春大雪募民貿易柴炭增其市價所全活以萬計詔使行視最書方上而卒邑民

悲之賻錢五十萬其子辭不受 通志

張汝賢字祖禹泰和人熙寧進士歷官御史臺主簿與中丞舒亶奏事殿上會有所顧問亶未對而目汝賢汝賢辯析如響上器之擢權侍御史除福建觀察使元祐初除江淮發運副使官至丞議郎直龍圖閣尚書左司郎中卒葬儀真 縣志

劉顯字微之吉水人登元豐二年第為光祿寺主簿時曾布當國顯於布為甥壻恬退自持未嘗一見後布貶顯得免倅虔州時母年八十六顯事之甚孝甘露凡三降於治解之松郡圖以進憲使張景修為立仁澤堂作詩

記之

縣志參  
林志

左書言永新人元豐進士授鄧州教授嘗括廢田三千頃以膳生徒學字一新經術大明 通志

按邑志書言其先潤州丹陽人仕終朝奉郎監察御史

梁俊字克端龍泉人元豐進士授南安府推官廉明多所興除民有繼母欲殺害前妻子走免訴官莫能窮聞於朝命俊鞫之俊緩其獄以善言使自悔不數月天降迅雷震警其母恐懼悔服慈愛如已出子亦盡孝養復命於朝賜詔褒美尋擢侍御史首論蔡卞章惇之奸次言朝廷不宜樹黨風範凜然未幾以天章閣待制提舉中太乙宮出為河北都轉運使兼治河安撫以疾終於官

所著有南城雜稿景行集

縣志

按龍泉志有梁俊萬安志有劉四愚皆稱官南安梁云授南安府推官劉云任南安同知查南安府志宋始立南安軍不以府名其官制未立有推官同知名目職官表宦蹟傳亦無二人姓名自是各志稱謂之訛未加深覈耳姑仍其兩傳原文而辨正之

郭履泰字安中龍泉人元豐進士任常州武進令歲饑議發廩賑民郡欲同市價履泰曰常平之法斂增散減所以平貴賤調艱阨也若賤市貴鬻此商賈謀利所為非法意乃減三之一官至朝散大夫

縣志

高文中字景通吉水人登元豐五年第授南安軍司理叅

軍會大水文中乃開獄語其囚曰汝之罪有死者有不至於死者獄壓則均死矣因縱遣之且曰水退當復至翌日水退無一人亡者後知邵州新化縣尤多遺愛

通志

本豫章書

楊存字正叟吉水人登元豐八年第知杭州仁和縣有尼挾時宰勢欲強取寺旁民地府守謂存曰此宰相意也宜從之存正色答曰三尺之法主人主所與天下共也由宰相亂之不可卒不與從官有薦存者宰相銜之不省

徙洪州通判終中奉大夫

縣志叅通志

彭淳字道源廬陵人熙寧進士歷守康賀二州有惠政崇寧中編入黨籍政和初致仕著有徹漢居士集

劉章字微之廬陵人計偕上書言事無所忌時蔡京擅國柄籍章名為邪黨不得與三舍選宣和三年始以免解登第終桂嶺令

縣志

王廷彥字英臣廬陵人元祐間宰南劍尤溪縣性廉敏能鋤強悍有邑人為郡胥素猾逋賦令丞尉莫之制廷彥詣郡召至杖之監司諸滯訟悉委使平漕使陳宗過邑境留詩於驛云畚田高下盡春耕野水涓涓照眼明莫道深山最深處人人解說長官清人士傳之

縣志

張汝明字祖舜泰和人元祐進士初任司諫有直聲時蔡京蔡卞當國汝明上疏劾奏之謂文武兩權盡出兄弟之手臣竊危之徽宗召拜御史後知岳州性至孝父病瘍刺血和藥既葬廬墓側母喪病羸行踣夢父授以服南星法用之乃愈

通志

通志按云林志汝明所著有易索張子前言張子卮言大究經諸書

葛敏修字聖功廬陵人元祐三年試禮部蘇轍知貢舉奇其文擢高等仕為確山令未幾罷敏修為人孝友兄敏求敏明連喪慟悼不勝發疾而卒有道岷集三十卷胡銓為之序初宰確山以元符上書被禁錮時論多之

通志

據人文紀畧

通志按云周益公葛聖功文集序云元祐三年東坡知貢舉奉議郎葛公奏名第七又云崇寧元年九月

詔書定元符有名人五百四十一名敏修在焉由此  
罷確山宰廢於家越三年始免禁錮謂公困久當少  
折其詩乃云從今黽勉為忠義一噓如何便廢餐味  
公此言豈以利祿得喪貳其心者使天不奪之年得  
進為於世不負東坡審矣據此則敏修乃東坡門下  
士非穎濱也

劉鼎臣字和之秦和人紹聖進士以大庾主簿攝吉水尉  
上書言十事用事者惡其切直以元祐指名禁錮累年  
遇八寶赦授雩都令終南安知錄 通志

李穀 舊志作穀 字頤正龍泉人紹聖進士歷高安令有重囚三  
十二人其二已死於獄蓋尉欲希賞以盜誣之也穀將

直之尉喉被盜者告於州旬日獲真盜於宜黃錄囚辭  
以報三十人皆免 通志

按邑志穀終朝散大夫

彭合廬陵人紹聖進士知臨江軍土既瘠前吏增耗與正  
額等民苦之合力陳其害浮稅悉蠲後為京西總領卒  
於官子商老叔牙漢老商老字仲伊以蔭官至南南通  
判嘗以法繩吏招謗卒無毫髮可文致內外臺皆賢之  
叔牙名周老以字行五歲知詩比長登進士補將仕郎  
授新淦簿時隣邑新喻旱甚叔牙攝篆會漕司載袁羨  
粟過邑叔牙白漕司稱貸報未下輒發郡督賦急以旱  
饑請少寬假守怒色不為動分宜盜起叔牙曉以禍福

其黨皆潰漢老字季皓累官直秘閣致仕所至多善政活瘼死之囚化茶商之盜正綱運侵欺革焚尸敢墓嫁宦族流落女嘗入見對三事皆報可又請增戍兵修器械豐儲積補常平亦多施行

參通志縣志

按縣志商老周老漢老皆合子周老縣志列名臣傳通志不采今參各志為合傳又查各選舉志合登紹聖四年進士通志傳作紹興疑訛

曾安中字舜和泰和人肅第三子後更名嶧字彥錫未冠登第官新淦尉徽宗初詔求直言安中以不克終為戒及上時宰書言大臣當以至正之道佐人主時蔡京用事計塞讜言籍諸所上書以為謗安中在其數後為清

川丞以言幽事忤王黼遭禁錮終身

縣志

曾安強字南夫泰和人登乙科調舒州法曹後提舉成都路常平至則民訴旱安強決灌口水以灌田歲因大穰士民刻石江上號均水記先是廬肆多火無以潴水安強按地為溝三百所或病之俄得斷碑乃張詠疏渠積水記中一一如所經畫時朝廷遣中人督上供帛有鄧述者挾持尤甚市物不中意輒焚燬安強疏其事徽宗斥述不用會戶部議糴東南粟百萬顧左右未知所對上曰曾安強可遂除河南常平居七月即罷卒於家初安強與兄安止安中皆擢第郭知章挽其母劉詩曰一門十捧鄉老書四子五折東堂桂西昌科目之盛曾為

稱首云 通志

張冕字君儀永豐人紹聖進士初為黃州尉改彭澤令尋遷華州守居官廉靜吏民安之晚年謝事歸田杜門讀書與蘇軾論交有詩文集 縣志

劉琮字粹老吉水人大觀進士歷仕諸王宮翊善金人議立張邦昌使范瓊以兵脅在城百官勸進琮自服利藥疾勢委頓使至門見琮不能支乃不果逼邦昌大為之愧有文學著述最多 林志

郭允升字彥信泰和人政和進士宰零陵時蠻獠擾民允升下車未久咸服其化而馭吏尤嚴改知安化縣多虎害有父子繼死於虎者允升蒞政虎皆遁去 通志

郭勁字孚履龍泉人政和進士由晉陵縣簿遷南安軍士曹期年聲大著叅政劉大中宣諭江西得治狀薦通判洪州方里居會邑令李準以疾免郡將王洋雅知其賢檄攝邑事時有旨分田地畝勁以私稅均敷不擾而辦洋揭之以表諸邑後知贛縣卒 縣志

楊祀 一作祀 字元卿吉水人政和進士始與兄邦乂同入雲際山寺讀書每相勵曰爵祿不必力取當力取名節耳邦乂死節祀宰貴池經理其家而收卹其孤以歸人皆嘆曰兄忠於國弟忠於兄不負其素所期也性剛毅寡合官至宣州僉判有文集若干卷 參人志

彭從虎字觀元龍泉人政和進士除道州僉判陞温州知

言安府志 卷四十一  
州温舊有海塘久湮沒從虎至即修復民沐其惠祀温  
州名宦 縣志

李發字秀實吉水人重和舉特恩赴集英試補鼎州司理  
叅軍攝黃陂令調零陵正豪民猾吏欺隱田糧二萬五  
千餘畝移永興興國通判橫州攝守賓州廣俗誘民童  
男女易翠羽於蠻中僅半歲掠買至數百人多烹以祭  
鬼發奏請禁之高宗惻然命焚翠羽改知貴州擢沅州  
改靖州沅靖介獠蠻為患發撫御有方興學校化導之  
胡銓入佐冬官上疏稱其文采過人尤長於吏事三為  
邑五典郡皆遐方僻地未究其才今雖老尚堪治劇不

報 縣志叅  
通志

尹躬字商老永新人宣和進士為江西僉書決獄吉水有  
繫逋賦者十餘人男女貫於一索聞躬至密置他所躬  
廉知盡釋之紹興間又為本縣主簿振興學校勤勞公  
事不擅受詞訟邑人服其公正其他異政尤多所著有

易解冬官解 通志叅永  
新縣志

李擢字允升吉水人由禮部架閣陞翰林侍講學士同陳  
東等上書乞斬蔡京相李綱謫筠州司戶卒 縣志

董昌裔字夢貺吉水人自少力學宣和四年補將仕郎歷  
郴州司戶叅軍攝永興令蠻獠犯省地發丁壯授方畧  
捍禦境土移連州錄事叅軍守志其執法屢寤以事昌  
裔不為屈或誣良民為盜平反之改錢塘丞攝令事顯



謨閣直學士劉才邵薦昌裔宜在臺閣添差通判婺州  
湖南轉運司主管文字王師討金兵四集餉糧不貲參  
知政事魏良臣帥長沙以名聞擢知興國軍宗室犯法  
繩治不少恕修學校增給生徒以年老丐閒改浙東安  
撫司參議移江西歸積官朝奉大夫

縣志

劉獬字去邪泰和人宣和鄉舉為衡州司法官歲饑民有  
窘於衣食犯法死者數十人獬請從末減太守怒碎節  
目擲諸地獬拾補以進數十人皆全活後為東流令寇  
騎南牧東流止隔一水獬調民防江以片紙榜縣遠近

胥集

通志

吳瓘字伯玉唐史臣競之裔祖為邑簿因家縣南連岡族

大蕃衍瓘善睦輯之時以孝弟稱蘇軾薦入史局後除

徐州通判卒

通志本  
林志

彭天順龍泉人宣和解試靖康應詔言事授鄧州司戶未  
赴復上書言和議非便李邦彥惡而罷之司諫陳公輔  
言其學行純正可為師表授廣州教授

縣志

羅棐恭字欽若吉水人建炎進士授虔州司理參軍宣諭  
使命鞠賊賊富且黠餽錢二十萬求脫棐恭竟論殺三  
十人移潭州平反死獄十一人遷荔浦令飭輓粟五千  
石餉宜州棐恭言縣抵宜州絕遠不通舟楫輓餉非便  
改知石城構捕宿盜七十人減民稅紹興間簽書道州  
軍事朝旨命鞠邵州民張臣駟獄初臣駟為讐誣與賊

通遂起大獄連坐三百餘人多瘐死者隸恭廉得其實  
正獄吏罪前獄盡得釋通判贛州俗憎女生則溺之作  
溺女戒文禁溺女者隆興初胡銓力薦於朝授左朝奉  
大夫知武岡軍以疾卒其學邃於名數字書所著有詩  
文三十卷

吉州人文紀畧

梁岳字堯咨龍泉人建炎進士授虔州司理叅軍宣諭使  
歷永豐虔化令時方捨攘訓練民兵勉以忠義後苗劉  
黨及境守禦有備隆祐太后幸贛多方護衛一軍肅然  
為政簡靜慈祥民稱頌之

縣志

龍溥永新人登建炎第任會昌令時尉兵作亂溥急捕其  
首論治之臺撫嘉其有應變才薦擢節度判官

縣志

羅上行字元亨廬陵人建炎進士少負奇氣以功名自許  
時岳飛奉命討洞庭巨寇楊么檄上行督餉諸郡至全  
州通判范寅倨傲不與上行抗責之乃發廩帑以應知  
上猶境内大治部使者上其狀請頒其條教為諸州縣  
式

通志

按縣志范寅作范寅秩上猶縣作安仁縣

李琥字西美廬陵人建炎間官瑞昌令庭無滯訟轉右通  
直郎賜服緋銀守惠州貪吏忌其正誣以事遂引疾去  
及譖者皆敗復授昭信軍簽書判官轉右朝奉郎以疾  
求主管台州崇道觀歸卒年七十七

縣志

陳千齡泰和人建炎進士官韶州曲江簿有潮陽令以軍

事犯職權貴多為之地檄千齡推鞫援者踵至夜饋以金不受推問得實陞虔州司法參軍

通志

胡鎬字從周廬陵人紹興進士任新淦尉兄銓謫海外鎬甘退二十年張浚始薦進之除諸王宮教授樞密劉珙嘉其靜退謂朝廷當以中秘處之不果請外補授湖南參議

通志

許富號公濟萬安人金兵南侵隆祐太后奔虔州軍乏糧

富轉運不絕上嘉其義後勅官祭酒父封學士

縣志

賴之承號尊爵萬安人官都統領與弟德厚皆嶽嶽不畏強禦曾面斥王黼梁師成秦檜等朝論憚之

縣志

董良史字邦直新淦人今查本籍永豐人紹興二年鄉薦

第一判洪州時江西運判張常先嘗憾帥臣張安道陷

諸遷客冀得良史證其事持不可移倅鄱陽秦檜當國任常先為鷹犬莫敢有忤其意者良史卒不阿論者偉

之參通志

按縣志董良史拒張常先遂請於朝乞避職改判饒州後為尚書監門卒

倪師尹泰和人紹興進士為英州獄掾太守周彥輝每引

例以折之師尹曰三尺固存吾安問例嶺南獄具多苟

簡師尹更革損益一以新書從事既卒貧無以歸其同

官助之妻嚴氏泣曰吾夫廉忍累之乎力辭不受

人物志

蕭穎字彥實安福人紹興進士知耒陽縣後起為廣東漕

屬居官清直能理獄訟父老為之語曰訟無苦逢父母

通志

戴之邵字才美安福人紹興間金人南下京西招討使吳  
珙以書招之充忠義軍統制給器甲五千之邵植旂南  
門外以募忠義日赴者千人遂分五軍與敵屢戰屢勝  
自鄭州入西京朝謁諸陵別置永安軍差官供奉諸陵  
分遣陳孝恭等收復鄭州密縣等處金人來攻之邵移  
兵嵩山深谷中設伏敗之還至襄陽珙勞於郊錄功不  
受竟歸鹿門孝宗時特改京官以刑部員外郎將漕西

京卒

通志

歐陽昂字仲謙安福人父皤然紹興初為武岡倅贊征峒

寇有功昂初業舉既以立功名自許適寇起遂舉兵助  
征有功授迪功郎紹興辛巳通判建康奉駕出狩幹濟  
有方復獻太平十策高宗喜親勞之遷朝議大夫有集  
行世

周因字孟覺安福人紹興進士歷官來賓縣令擇地遷廟  
學撥公田養士躬自教導俗病不醫唯屠牛祭鬼因教  
以湯劑境內多盜嚴保伍閱鄉丁盜以息改德安府教  
授郡志缺畧為著鄖城叢記知贛州雩都縣茶寇有薄  
境者提兵却之進通判邵州生平奉身清儉先疇推與  
諸弟周人急無所靳霆震其六世孫也所著有文集二  
十卷

張廷貴安福人紹興間大理評事上言明政刑訓軍旅忤時宰湯思退罷歸朱子過之嘉其風力足稱以上縣志

劉禹錫初名珪字季成永豐人紹興進士授筠州司理參

軍嘗詣闕上書請乘北邊歲饑選將調兵復中原修陵

寢上嘉之左相虞允文表署江州觀察推官擢朝散大

夫守鄂州兼領荆湖北路提刑時有誤犯死刑者禹錫

平反之及歸持金帛來謝固辭不受從者私納之事覺

索而投於江從者載一缸於舟尾命碎之曰毋汚我家

居築清風臺吟咏其中參通志

張瓘字少偉永豐人紹興登第歷官施州通判兼管内勸

農事操守嚴謹刑賞皆得其當朝出主之縣志

毛惠直字鞠老吉水人紹興進士授邵武主簿時光澤令

以非罪繫獄部使者命惠直往鞠之閱獄詞多文致即

平反之改漢川令縣苦兵荒惠直至畢力撫字尉與惠

直有郤陰遣卒斧縣庫盜官緝錢事覺跡至尉所法當

坐尉惠直曰吾第求盜耳既得盜又何求竟置尉不問

太守黷貨諸邑爭剝民賂之惠直喟然曰股民以自安

去官以安民兩言決爾遂引疾歸在漢川給俸數千萬

錢悉不取民益思之縣志參通志

左慶延永新人紹興進士秦檜欲妻以孫女力辭不就或

曰不利慶延曰士一失身則無以復立苟不利退而山

林亦自多矣遂西歸檜憾之十年不調後以太學博士

通志按云左所著有澹園文集胡應春序之曰觀其與晦菴書推明理義問辯反覆必極其底止使得行其志斥奸排佞豈止辭婚權秦云爾哉

龍時蜚永新人中紹興間拔萃異科授翰林供奉時權宰專政蜚於中詆議之無少避遷給事中操秉愈堅後歷翰林承旨賜紫

劉四愚號惺菴萬安人由安成徙上宏紹興進士任南安同知有餽以錦衣者却曰象有齒以焚身何錦為後朝廷遣刑部侍郎張九成賫誥褒榮

按官制訛稱已詳跋梁俊傳後

蕭澣字嶽英吉水人七歲能屬文年十二三有聲郡學三舉禮部不第以薦授將仕郎遷迪功郎監常州犇牛鎮始至搜蠹剔弊遠近商旅走集秩滿以課最增秩監潭州南嶽廟戶部按賞賜錢四百萬辭不受調全州清湘丞改武陵請老以通直郎致仕加奉議郎

嚴康元字自中泰和人官韶州錄事叅軍有僧告其徒謀變連染數十人鍛鍊將成康元力為辨析再鞫得實全活甚衆後為會昌臨湘兩縣令撫仁柔懲奸暴掃弊去蠹潔已便民改朝奉郎潮州通判卒

劉令猷字辰告泰和人獬子幼穎悟年甫冠登紹興辛未第授婺源尉再調贛州興國簿常德府觀察判官任興

國時吏齊金來迓槩却之任常德地號險阻屢奉檄奔走人以為勞令猷曰分所當也嘗考試宜春江陵號稱得人

泰和志按云萬厯志稱令猷為常德府推官辭受進退有解之風

蕭暈字叔稱龍泉人世京孫以叔父叙辰廕厯辰瓊二州推官遷江陵令吏事通敏會黎獠寇瓊方滋以師出討辟暈偕行暈請單車入壘布宣德意黎人聽命紹興初劇寇犯雷化雷守死之朝廷再起方滋經畧桂林滋首薦暈知雷州殄滅寇攘安集流徙秩滿帥臣張孝祥保奏留任逾年致仕官至朝請大夫以上縣志

歐陽旻一作杲字彥昭永新人隆興初任新化主簿著書心錄以見志年方壯遽請致仕時宰固留之不可遣之書謂古今所難而獨易為之高風凜然足以律貪激懦及卒胡銓志墓通志

羅全畧字仲謀廬陵人乾道進士永州司戶叅軍湖南歲饑當發倉全畧單騎入墟落家喻戶曉民被實惠嘗奉檄按永州白減其租過半掾漕不可全畧曰得邦賦失邦本其患孰急太守從之民曰活我者戶曹也通志

胡昌齡廬陵人銓從子也乾道己丑以特奏召對策萬餘言唱名入高等厯官至靜江府司戶叅軍咸稱其廉平滿一歲去帥守張栻留之不能作詩送之卒賜服金紫

宣議郎昌齡早喪母奉父誠篤學終身不忘事二繼母  
盡孝其著述必援證不為游辭積籍五十卷

縣志

羅維藩字价卿廬陵人乾道進士任保昌尉秩滿入京師  
極論二廣煮海改法之弊又作平邊策謂當首甦民瘼  
興內治以俟天時

通志

曾三聘字無逸臨江新淦人

今查本籍吉水人

乾道進士調贛州

司戶叅軍累遷軍器監主簿有旨造划車弩三聘謂划  
車弩六人挽之而箭之所及止二百六十步今所用克  
敵弓較之工費不及十之三一人挽之而射可及三百  
六十步利害曉然乃不果造光宗不朝重華宮中外疑  
懼三聘以書抵丞相留正正未及言會以他事不合求

去三聘謂凡今闕廷之內父子夫婦之際羣臣莫敢深  
言者避嫌遠罪耳丞相身退計決言之何嫌乎帝欲幸  
玉津園三聘上疏言今人心既離大亂將作小大之臣  
震怖請命而陛下安意肆志而弗聞知萬一敵人謀知  
馳一介之使問安北宮不知何以答之孝宗病革復上  
疏言道路流言洶洶日甚臣恐不幸而有狂夫姦人託  
忠憤以行詐假曲直以動衆至此而後悔之則恐無及  
矣帝意為動及孝宗崩帝疾不能執喪朝論益震洶三  
聘謂今日事勢莫若建儲寧宗立兼考功郎後知郢州  
會韓侂胄為相指三聘為故相趙汝愚腹心坐追兩官  
久之復元官侂胄誅諸賢遭竄斥者相繼召用三聘祿



不及終不自言嘉熙間特贈三聘官直龍圖閣賜諡忠節

宋史

按曾三復為三聘從兄先據府縣志列入大臣三聘入庶官傳中及查宋史三復傳註臨江人三聘傳註臨江新淦人通志亦收入臨江人物不以入吉安又加按云三聘係三復之弟其為新淦人史傳其明人文紀畧正氣錄以為吉水人者皆訛人物志既以為吉水人又以為峽江人兩處重見者尤訛楊誠齋淳熙薦士錄自朱子以下凡六十人曾三復三聘兄弟與焉等語復查核通志選舉宋紹興三十年庚辰梁克家榜進士曾三復名下及乾道二年丙戌蕭國梁

榜進士曾三聘名下則仍並註吉水人又援林志一作峽江人豈立人物傳時未及核對選舉志改正耶抑吉安之吉水與臨江之新淦本屬接壤而峽江為新淦之分尤與吉水為近故彼此牽互登載耶今檄取吉水曾氏後裔族譜核明曾氏自西漢末有名據者徙家廬陵之吉陽鄉傳十數世又有名君彥者始居今吉水之蘭溪君彥次子光庭居今南華其幼子敏行徙南華之龍城子七人三聘三異三英尤著惟三聘於紹熙間自中秘黜官別築新淦之石梯子自號岡南牧夫有岡南別居記元末五世孫志道仍歸吉水南華後無有遷移於淦者據此則三聘仍入吉

水為確史傳通志究未詳其本末也故特登其傳而辨正之

孫逢辰字會之龍泉人逢吉弟乾道進士淳熙中茶寇轉掠江西逢辰以贛縣丞督餉乃隨所至易米省饋運十之七八後又上計漕司將袁贛兩州所納油麻隨升斗而折之所少之數悉與蠲免漕司奏請得旨兩郡悉蒙其利通志

按邑志逢辰知澧州復知袁州有養晦稿三十卷羅克開字達父龍泉人乾道進士宰廣昌有惠愛憲使鄭汝諧行部邑民遮道借留鄭問知縣何長民雜對曰不愛錢不苦百姓此其所長也遷大理正同列欲奪巨室

沙田歲入以媚韓侂胄克開力持不可由是出知郴州至州首廢永豐銀冶還社倉於民移守蘇州青衫手板外惟橘隱集三卷而已通志

按克開白志作永豐人又郴州舊志作柳州袁州作萊州

王化原泰和人淳熙進士初為新淦簿時缺令化原一以禮法治之人憚其明治聲翕然遷鬱林州司法其俗頑獷化原撫之以恩遇獄訟必誨之不悛然後用刑人皆知感縣志

堯堯輔字道夫廬陵人以蔭授贛州錄事與提刑執辯活非罪死囚官軍捕茶寇間俘平民堯輔悉平反之進知

連州陞辭論枝江義勇差役興國私鑄上皆嘉納通志  
 劉南鵬字叔程永豐人淳熙解試除潛江尉改新淦丞廳  
 後池蓮有一幹兩花之瑞將赴春官適委問清江疑獄  
 南鵬曰功名輕人命重即變姓名為卜者廉得真殺人  
 犯及水涸又得被殺人冤骨釋無辜五十餘人御史及  
 監司郡守交章論薦所至以寬廉稱年老授通直郎致  
 仕縣志

張鋼字德堅永新人翬之兄子淳熙進士靜江司戶決滯  
 獄興水利遷永平令以威愛化狃獍創浮橋教民醫藥  
 既滿將去蠻人相率詣帥守監司乞留後以宗正知郴  
 州入對言薦舉殿最不公文體士風未正及州縣侵漁

諸軍老弱戰艦蠹弊宮祠泛濫民力彫瘵上皆嘉納之  
 二子長潞字東之蔭授鄱陽簿改桃源宰擢倅八桂知  
 昭州條奏便民三事悉施行民有去思仕至朝散大夫  
 次淵字明之嘉祐間蔭補迪功郎開禧鄉魁初簿江華  
 憲使胡獬羅致上幕京西帥楊九鼎辟克帥幕既至漕  
 使趙方號知人首委以事後宰新建方時為制帥復辟  
 宰江陵終承議郎孫楸字子修潞子景定間宰茶邑瀟  
 衡寇竊發倉廩匱詘捐貲糾壯士協官兵力守孤城論  
 功進秩奉議郎賜緋終朝奉大夫帥司叅議通志叅  
縣志  
 按邑志鋼家藏書萬卷捐金梓謝尚書諤孝史又自  
 類編宋列聖孝治一百卷表上之所著有橫江叢稿

路著有龍川集淵著有東巖稿

劉德禮字敬叔安福人淳熙進士授常德府司戶叅軍府胥與民為市賦籍舛甚德禮稽之不三日即復故陞賀州教授陳時政十事時宰怒改涪州教授建言損益鹽法及外銓擬官二事補臨川令辯誣枉賑饑瘞死平役鋤強政績甚著生平持身嚴謹學極博尤長於周官

縣志

戴翊世字漢卿安福人淳熙進士授衡山尉臺府以其才交薦遷雩都丞郡守留置幕職會孝宗詔漕臣權宜州縣財賦檄翊世質漕臺數受詰讓翊世爭益刀歲減三萬六千緡有姜姓者為盜汀梅間聲動贛境翊世攝倅督捕請罷遣鄉兵計省費萬盜卒無敢犯境秩滿調江

華令改知彭澤遇凶歲修荒政民無流移者

縣志

按戴翊世廬陵安福兩縣志互見傳文科目事實悉同其為一人無疑舊府志人物表歸安福今從之

曾光祖字景山安福人淳熙進士仕徽州錄事決讞明敏薦知新喻逾年而邑大治平居喜著述有禮記精義治功必致錄行世

通志

胡清臣字楚材廬陵人淳熙解試歷官高安丞所至皆有聲有分閫欲辟為屬令竟掛冠歸留意書史

劉廷直安福人常學於胡安國始為鄂州掾時出師中屯兵數萬於鄂忽軍中積芻火州守踪跡三偷兒火具委廷直具獄廉其情曰此將竊藏於民家實未至壘且以

火具而被殺有異於以釀具而抵酒禁者乎守釋之薦  
丞武陵數決疑獄旱禱輒應致甘露本邑西寅陂久擅  
於豪右廷直請而均之

王琳字子林廬陵人淳熙進士監車輅院韓侂胄當國欲  
見不屈授瀏陽主簿歷融州推官衡山茶陵二縣令知  
南安靖州疏罷貢銀學行政事為時所重

胡棧廬陵人銓孫仕於朝疏史彌遠之姦出主管華州雲

臺觀終德慶守人皆憚其有祖風

以上  
縣志

張奐字保叔廬陵人以門蔭累官知永州建炎兵餘民多  
死徙賦稅罅漏奐白府請檢校冒耕之田實其主名府  
以新建武寧二邑命其檢校得實以報下其法於諸邑

其賦始均歲饑乃節浮糴鄰得粟十萬石活饑民九萬

有奇子履字坦夫亦以廕補迪功郎主辰州淑浦簿以

敏健稱

參通  
志

楊長孺字伯子一名壽仁吉水人萬里子孝宗淳熙元年

甲午四月詔舉制科長孺以書經薦名蔭補守湖州彈

壓權貴治聲赫然郡人士肖其像於學宮與秀邸相持

譖之寧宗謂不要錢是好官擢經畧番禺將受代以已

俸七萬緡代下戶輸租帥閩強宗累年負租置諸法署

牘曰爾為天子親我為天子臣爾犯天子法我行天子

刑強宗震恐盡輸之會真德秀入對寧宗問今廉吏以

長孺對端平間累召不起以中奉大夫敷文閣直學士

加集英殿修撰致仕紹定初起判江西增鄉校養士田  
壬辰大饑力請郡發廩賑荒自號東山潛夫晚號農圃  
老人有東山文集知止休官等文集卒年八十諡文惠

通志

通志按云長孺誠齋長子年七十餘致仕家居與雲

巢曾無疑友善往來倡酬時稱其風味不減平園誠

齋云

葉之茂字秀實萬安人紹熙中累舉授大庾縣尉民有父  
子訟者歷臺府三歲不能決之茂訓以一言孝慈如初  
事母孝兄弟無間言母喪廬墓三載

府志

康莊安福人教諭石門轉石鼓書院山長以已俸復院田

陞吳門教授判永新並著聲稱壘山先生嘗割股愈母

病

縣志

陳午泰和人高州學教授歷國子監簿浙西大帥為文信

國天祥座主

解禧字公和一字宗魯廬陵人

一作吉水

初授郴縣主簿歷邵

州推官知豐城興國兩縣通判衡州知賀州未赴而卒

在郴時群蠻苦歲饑將為亂禧至宣諭威德轉粟賑恤

蠻惶服邵民有兄弟爭產訟三十年不決禧以大義至

情感悟之頓罷訟豐城號繁劇文牒日數百紙剖決如

流一夕吏呼一人立庭下試禧禧曰此非晨來投牒者

即杖吏觀者皆稱神明帥王藺初至風采凜然禧笑曰

是可與言矣乃條病民者三事以告王於是蠲征商積  
道減經總緡錢罷月椿布邑城瀕江多水患又增築新  
堤以防暴漲水不為災施師點表薦改秩尋宰興國罷  
贖金蠲緡錢摘伏奸直寃獄當道交章薦之乃有賀州  
之命陞辭詔取其奏議以聞一曰君德二曰役法其議  
端實可行朝論嘉之縣志

李如圭吉水人中童子科孝宗召誦尚書如圭即誦無逸  
篇帝喜撫榻和誦至終明日賜宴以父在賜珠簾隔之  
後登進士官至福建安撫

蕭麟縣志字耕道廬陵人開禧進士知仁化縣教民為水  
車救旱為民奏田缺賦存之害卒於官民肖像祀焉

左暮字元規永新人開禧進士使金不辱命錄國子大得  
士心廉察黃岡沿江要地城堡完固未及召而歿民立  
祠祭之所著有坦齋彙

周雲字從龍吉水人以詩古文受知於益國周必大開禧  
間真德秀奉使辟掌箋奏授行在同知主管樞密府機  
宜文字領兵北歸調荆襄累有功擢廣西兵馬鈐轄二  
親喪即以所居立院守其墓

羅晟邑志字伯華龍泉人以蔭授郴州司理有誣平民為  
盜者言於郡釋之治新喻請官田以養士治合浦能禦

寇不為民擾以上通志

張煇字晉叔永新人有文武才連捷漕監丁未楚氛煇募

士衛鄉井復從將軍文信平寇鄭逢辰奏授官使相呂文德留贊邊幕范殿帥文虎辟克殿西水軍統領兼臨安府鈐轄癸丑明堂大禮差克職事

孫鏗字熹甫龍泉人逢吉子以父廕為瑞金尉嘉定更化凡名臣以忤權奸斥罷者皆擢其後鏗調官京師不事請謁因授酒稅官歷秩知衡之茶陵未幾罷去調建昌府新城令閩寇猖獗募兵拒之邑得以全未幾以郡檄議事輿疾以行終於郡郡聞於朝詔贈官仍祿其子

賀昌鳳字德文永新人今隸蓮花廳嘉定戊辰進士第二授秘書省校書郎初呂祖儉知吉州以賢良科薦時韓侂胄專權昌鳳辭不就及侂胄敗乃赴試次年史彌遠起復為相因嘆曰斯人秉政猶侂胄耳可與之同朝乎遂偕鄭自誠掛印去

羅清憲字榮道廬陵人自幼穎敏讀書一目數行下年甫冠登寧宗丙辰進士歷官嶺海左遷判江都特作詩以自娛曰道明誼正真良田莫向趙燕尋董士時江東大旱清憲為民步禱甘雨如注仍疏乞減今年田租之半上如其議會元窺江左諸路坐困詔陞清憲經營戎務江左遂寧尋以年老乞休歸遠近從遊者衆門人私推為櫟陽夫子事父母以孝聞居喪廬於墓側卒年七十有三

以上縣志

劉元剛字南夫吉水人嘉定進士初任信州永豐主簿真



德秀見其文亟稱之歷官靜江江州撫州崇仁監左藏東庫時當國者欲增修楮幣元剛力言不可出為泰倅除韶州守理宗嘗立貪廉二碑元剛居廉碑第四司左藏帑物失初以尤元剛朝廷察其廉不復問家無餘貲年八十卒無以殮越三年吉州繆元德葬之元剛於元德為座主也所著有孝經論語孟子衍義容齋雜著數十卷天祥誌其墓

林志參縣志

左師召永新人嘉定進士守新州始終廉潔却舶貢不收委公俸不取秩滿致仕去

通志

龍升之永新人嘉定解試陳愷帥九江禮聘任以事遂建城永新之議奏名調臨川戶曹預修中興政要書成除

福建節幹在幕修帝學增釋二百卷

通志

胡敬之吉水人文彬子也未仕時與歐陽守道講學白鷺洲書院歷修職郎沅州錄事參軍所至除淫祠釋冤獄後以言史彌遠被斥還鄉隱環洲子震龍仕至將作監

丞

參人志

胡夢虎字叔炳吉水人登紹定五年第宰臨江新淦倅南雄司行在左藏出守臨賀未去卒所至有政聲終身無玷有文粹精語坦菴叢稿三十餘卷

縣志

黃登吉水人紹定進士主管制司機宜文字援筆立成夜有謀變者或以告登堅卧不動翌日坐廳事以他事召之誅其首餘悉不問一軍乃安

通志

劉洪範安福人端平進士歷守永州袁州嘗以博士召見  
理宗以為廟堂人物輪對甚言青苗茶鹽法未便辭歸  
袁人勒其治行於石洪範通諸經尤深於詩所著有奏  
稿數卷

縣志

胡登號東山萬安人端平解試授興國令興邑多盜登至  
悉撤武備單騎詣賊壘曰汝等亦丈夫何至作綠林銅  
馬遺惡名耶賊黨悔悟即解去

縣志

劉南甫吉水人嘉熙進士嘗講學白鷺書院歷安遠縣簿  
去淫祠治冤獄民至今祀之

通志

按歐陽吳齋主講白鷺書院在其登第以後其登第  
為淳祐元年而江公亦以淳祐中守吉州始建書院

今劉南甫以嘉熙二年登第嘉熙年號在淳祐之先  
縣志傳中稱未仕時與江歐相師友講學其時江公  
尚未守吉州書院未建何從與之講學耶特辨正縣  
志之訛改用通志本傳

劉應美永豐人嘉熙解試為桂陽令邑界獠洞舊多警應  
美至棟練士卒取其首殲之自是獠不敢犯後令長溪  
有故友餽以厚金怫然曰君子相合以義何得污我

文紀畧  
新增

蕭子蒼泰和人淳祐解試德祐間文天祥提兵辟為臨江  
軍司戶補迪功郎

縣志

泰和志按云宏治志又稱科舉錄無子蒼名止有蕭

應角疑即其名也

劉奎字幼文泰和人由進士官濠州通判宰寧鄉時寇逼潭城制帥軍餉不給奎以縣帑干緡上之為諸邑倡治行表著臺省交薦以賢能名

人物志

劉彥登字允升永新人由舍選登進士後提兵討虔寇邵境以安歷官三十年終朝請大夫知漢陽軍所著有竹

溪文集

豫章書

李應革字式夫吉水人寶祐進士累官崇政殿說書時吉州大祲經筵講罷上從容問應革鄉里即以饑對上惻然應革復取建隆紹興乾道賑饑故事反覆陳奏上為捐粟十萬賑之後進讀唐史至西平忠武王傳上知應

革為忠武裔特書手詔賜之復賜宴便殿御書詩翰以

賜應革賡和時人榮之

林志

劉顯仁永豐人寶祐解試為丹徒令邑俗治喪尚浮費多停柩弗葬顯仁立法厲禁之俗為一變遇無告者捐俸

濟之至乞休歸緼袍蔬食晏如也卒祀名宦

采人文紀畧新增

蕭逢辰字應甫泰和人官至江南西路安撫使兼知州軍事開慶間元兵過臨瑞長驅而前廬陵倚逢辰為重其父耒陽令知嘗割田三百石為義莊以贍族逢辰復增七百石又收養道旁棄兒月給米三斗

縣志

范元鎮安福人以能書任武岡錄事攝綏寧桂陽所至無阿避初在帥府有田千戶死子幼弟奪其官并產子長

愬之帥乃右弟元鎮抱牘力爭之弟復求援行省亦不  
復改議其在武岡值兄弟爭財元鎮諭之即解綏寧人  
誣舒八殺人鞫之實藍姓也諸崗饑疫死者過半元鎮  
優恤之桂陽民失牛跡無所得忽一猫嘍牛耳號於庭  
元鎮令索猫主果得牛及卒民無遠近皆縞素會哭縣志  
尹曰聰字清陰安福人由進士宣議撫州愛民如子文天  
祥嘗署其居曰高門孫用和有春秋通旨傳世通志  
也人物志訛

羅德文號淡叔萬安人由貢士授上海令始蒞任即以孝  
悌化民繼以文學督士雲間士夫有政美清慎勤吏賢

風石頌之稱縣志

王元孫字伯初吉水人理宗朝皇嗣未定元孫年十七伏  
闕上書請立忠王榘為儲嗣凡十七上得允授樞院校  
勘自是朝端以忠王言卒正儲位度宗蒞祚欲加恩堯

致仕歸參通志

會先之字孟叅吉水人少師事王介登咸淳進士監惠州  
石橋鹽場以主學心制解官起潭州醴陵尉轉湖南提  
刑僉廳權檢法官詳覆大辟多從平恕提舉茶鹽司幹  
辦公事凡所任理無一毫私曲宋亡隱居不出所著有  
十八史畧年九十二卒祀鄉賢

羅惠孺字士迪永豐人咸淳間榜眼及第累官荆湖北路

江淮制幹德祐阿里阿涯右丞進兵屠沙市江陵歸附者惠孺慷慨流涕詣右丞軍前上書乞留閩廣以存趙祀丞相義之而不報奏擢江陵總管不就稱疾歸

會恭甫號得雲萬安人咸淳間以州掾起有器幹善於言事值用兵方畧得宜大吏重之不以丞尉視數著勞績歷官河南觀察副使

王公甫字偕山萬安人以薦辟授通判民有劫財殺人者鞠問不服公甫諭曰汝行劫法自不貸况殺人乎民感悟實其情由是吏民敬服

以上縣志

元

陳先得字辰翁泰和人早歲為詩冲淡所居僅蔽風雨嘗

墾隙地蒔菊為娛稱菊存先生元時官終贛州教授致仕卒年九十四子學禮字季立至元中以薦為瑞金教諭轉梅州學正學田為徭獠所侵按籍取之有懷金謝者却不受陞廣州教授復侵地覈隱租大新學校改贛州司獄州獄具酷械牀以石為之禮易以木夏備漏浴冬給薪炭雩都有守禾者為盜所挾事覺坐罪禮言於部使者白其寃陞瑞金縣尹尋以贛州路推官致仕卒年九十子道子分教始興新興東莞三學遷韶州學正所至有聲改潮陽教諭

羅尚志字睦華龍泉人皇慶間薦授婺源縣尹修學校興水利政化大行改寶定府經歷致仕

劉元字仲元吉水人師劉辰翁為高第弟子未冠當道天僚辟為掾擢檄巡捕活永豐湖西民千餘家遷司贛州稅務攝吉水令邑大治暇日與諸文士講學不輟

蕭天從號文齋萬安人由進士司浙江廉訪使德政丕著

揭傒斯稱為真人傑不愧科名

以上縣志

楊景行字賢可太和州人延祐進士授會昌州判官會昌民素不知井飲汲於河流故多疾癘不知陶瓦以茅覆屋故多火災景行教民穿井以飲陶瓦以代茅茨豪民十人號十虎干政害民悉捕寘之法調永新州判官奉命覈民田租除剗宿弊奸欺不容轉宜黃縣尹理白冤獄之不決者數十事陞撫州路總管府推官金谿縣民

陶甲厚積而兇險屢誣陷其縣長吏罷去之暴橫於一郡景行至以法痛繩之徙五百里外豪僧雲守發人塚墓取財物事覺官吏受賄緩其獄景行治之如法由是豪猾屏跡良民獲安轉湖州路歸安縣所歷皆有惠政號去民皆立石頌之以翰林待制朝列大夫致仕年七

十四卒

元史循吏傳

按高安朱軾循吏傳論云下泉之詩蓋有恩澤及於莠民而反遺乎善類而作也故列泉以浸蕭是周之衰也若陰雨而膏苗則郇伯之政也夫莠稗不芟則嘉禾不茂莠民不去則善類不安景行之治撫正取諸此

高若鳳字在翁吉水人至治進士授建昌州判官有惠政

改江西等處儒學副提舉累校文江西授大庾知縣遷

平江路推官轉福建道都元帥府經歷知封州興學卹

民練軍養士會連城有寇警若鳳領兵收捕單騎抵賊

穴降之賊皆感泣羅拜解去遷廣東路推官尋改知府

卒 人物志 參通志

劉震字更震吉水人至治進士歷袁州推官政務清簡不

尚矯激處察寀和易蒞民庶寬平所著有蒼筤駢驪書

經卓躍 縣志

周志遠吉水人以危素薦授太子說書一日得母書召其

歸飄然南去志遠生於元仕於元然其心若不自得

者嘗自贊其像曰十年塵土變形容惟有丹心日月同

北海子卿羝不乳未應已在畫圖中 通志

王仕政字小隱萬安人泰定進士除信豐主簿以德化民

不尚刑辟改會昌猶治信豐 通志採人物志

尹希善名清淑吉水人博學能文程鉅夫至江南起遺逸

薦荆湖儒學提舉改宣州宣城令有善政以疾卒於官

民哭之曰公來何其遲公去何其速使我宣城民何以

遂生育 縣志與林志同

劉文德字方周廬陵人泰定鄉舉登進士授泰和州判官

政績甚著 縣志

夏日孜字仲善吉水人天歷進士授南康路建昌州改興

國路錄事再調紹興路會稽縣尹任建昌州有溉田三  
畝與國地僻俗陋撫以安靜首贊郡庠確範金石創置  
大成樂修城東堤三百餘丈周樹以柳舟航聚落隱為  
一郡勝槩會稽為浙東壯縣日孜孜至驗糧賦為高下仍  
歲籍之使無竄易為奸縣口鹽課素侵於私鬻復設法  
完課無有侵漏山陰富室徐某以私怨殺人沈尸於海  
人讐異母弟誣以偽造楮幣幽之使不得自白推官賈  
師泰委日孜孜治其狀按徐某罪修孔子大禹南鎮諸廟  
及馬太守祠縣志  
聶以道吉水人少儻嘗錄永豐儒學棄之去為吏從參

政整理海南鹽法盡除宿弊文宗在潛邸聞其名召見  
甚嘉之考滿官江華縣尹興學校勸農桑復流民三百  
戶墾田千餘頃歸旁民詭寄徭獠不犯其境天歷中中  
書奏以為武昌推官上驚曰是非不愛錢聶以道耶在  
湖廣裁減歲制萬緡經歷海南北與監司力爭平湖書  
院不得為老子宮又建議沒入命婦為人妻孥非盛世  
事歷陞廣東宣慰副使僉都元帥府事卒縣志  
戴邁字養高永豐人泰定進士授南昌縣丞入為國史檢  
閱陞河南府推官一以愷悌矜坦為念南昌舊有中宮  
脂粉錢邁議易輕齎民銜其德在河南平反李氏冤獄  
在江浙校文盡得名士歐陽元揭傒斯在朝凡有制作



必遺屬草與兄養浩養直皆工詩文參縣志

劉萬字聞庭安福人天歷進士官太常博士帝祀南郊告

祭大廟至寧宗室曰朕寧宗兄也當拜否聞對曰春秋

魯閔公弟也僖公兄也祖廟之祭未聞僖公不拜帝乃

拜羅翰林編修宋史成進修撰著有春秋通旨容齋文

集

按聞庭縣志作文庭天歷縣志作天順

劉任字粹之廬陵人至順進士同知昌州改旌德縣尹有

指於木類人形者為佛民間相聚拜禮性命昇至庭曰

亦也命焚之後調鎮江未行召修宋遼金三史未成卒

龍允庭吉水人來安縣主簿當淮南有警饋餉不乏兵部

尚書黃昭招撫江西以光庭參謀軍事首倡義士黃子

淵蕭景忠率眾擒賊首李彬一吉安遂平以上通志

劉桂平萬安人以鄉舉任河南淇州學正創鄧林義塾并

給膳田以教鄉之子弟吳文正澄紀其事縣志

李復登安福人至順進士為江華尉修治學校立濂溪祠

取經史以化導之邑遂稱治通志

胡希仁字時中吉水人由茂才舉授福州古田縣尹有林

晉者餽金數百兩求薦卻之平章燕支不花聞而美之

曰子何減於楊震年八十以疾卒子直孫槩皆以春秋

擢科第縣志參林志

起周永寧人邑舊隸永新賦役維艱與鄉老劉彥時等

元庶官 四七

請於州乃置今縣時刺史高士廉見其賢特奏辟為南  
總稅課使以廉自守商無濫稅及歸州官鏹倫平其民  
之至梅嶺為作廉吏傳以紀去思縣志

楊升雲字雲衢泰和人任貴溪縣丞張真人家恃寵驕恣  
為民患升雲繩以法張嫉當道誣謫之云得白改判新  
淦扶善鋤奸不少挫捕得真盜上司欲之為棄官去林

蕭泰登字則平泰和人廣東提刑僉事獠賊逼城泰登急  
上馬督捕獠遂遁去時安南久失藩臣禮奉詔往諭疑  
懼相半泰登喻以來意歸所盜地二百里奉表貢獻陞  
廣西廉訪使陳便宜二十五事進南臺監察御史復言  
十事分按江浙卒於驛通志

按蕭泰登傳廬陵志互見今從通志歸泰和

謝維斗安福人紅巾破城維斗率兄弟搏霄輩迎知州盧  
岡復之擒斬偽官趙普鉉於古城岡戮逆黨易季方劉  
清四於市授廬陵縣丞未幾寇復至又破之陞本州知  
州以迎大軍功陞吉安路同知時兵悍歲饑人相食維  
斗竭力活之又擒劇盜矍京逢元寘於法縣志

羅文節廬陵人由監生授昆明學正補大理金齒宣慰司  
令史操持廉介為雲南行省掾史掃除弊政聲震遠夷  
滇地有輪能興雲致風雨歲大旱文節為文檄之大雨  
大吏嫉其能劾去之得白復官重慶路瀘州同知縣志

蕭諶字一誠泰和人初授萬安縣學教諭龍溪書院山長

南康路照磨江西盜竊發嘗移書諷憲使韓準後陞福建儒學提舉子尚克世其家

縣志

兵忠尹

一作尹

字莘樂永新人登進士授永豐縣丞既去民

歌思之元季棄官歸徜徉山水間賦詩自樂後進多師之于孟勤仲謹能世其家

通志

按丞永豐時歲大歉府檄如他郡乞糴思尹請之贛贛守重其賢出粟二千石助之民賴以活復攝廬陵鞠死獄釋良民之寃者六人

蕭文孫字煥有吉安人年十三喪父服除遊京師上救荒策於御史臺或欲引是以薦乃憮然曰吾豈以救荒書媒仕進哉以集賢學士王德淵薦起為桃源州儒學教

授遷臨江路總管府提控案牘新淦民李殺人驗者受賕蓋以疾乃移書摘其伏請改讞上下囊橐不省適監察御史行部至文孫白之受賕者始自首屬他官剖棺察之見其助斷者四李伏罪罷官六人吏七人同列惡之在官十八月而去遷廣東道宣慰司都元帥府照磨會權臣枋國不用漢人為幕長令下即行久之調武岡新寧尹郡民唐訟仇家擅殺家奴毛棄之江屬他尸自上流漂至察之無殺傷痕不驗密令人生得毛於永州之境乃抵唐罪莫不駭服以為神綏寧尹頓使酒殺人部檄新寧按之有以郡官意風使全其人奮然曰若然則不覆驗官俱當抵罪活一凶如死者何吾不忍為也

即推驗其獄省憲考為湖南最嘗作忠孝二史經筵檢討危素言於朝以其書可備勸講會修宋史行省上其書史官稱為纂述有體未及擢用而卒弟孚有以能詩聞揭傒斯序其集 白志

通志按云蕭文孫可稱循吏而元史無傳林志豫章書不載白志采危太樸文補入

歐陽永字存遠吉水人博學好古至正元年以茂材舉授江州茶運司奏差遷鹽運司照磨有能聲活逮死囚徒數人元季兵亂歸隱卒 縣志

韓夢臣字希說廬陵人為從事郡府以練達為守長所信任至正間亂作憲使辟置幕府多所裨益行省第其功

授撫州知事不果行博學能文尤善樂府有集行世 縣志

劉中孚字志行吉水人舉茂異至正間任南雄推官用刑平恕囹圄常空部校與富民徐氏有隙誣以反逆繫獄者三十人中孚錄囚得其情平反之湖寇圍城十餘日散帑金率子弟及部民守北門寇不得逞比賊再至勢益張長官欲降中孚曰吾頭可斷不可降也卒莫能強後知英德州以完城工擢肇慶總管辭不就有梅南集

十卷 通志本廣  
東名宦傳

劉本泉泰和人至正間江西廉使吳當舉授潮陽儒學教授兵興叅政金子仁命領兵鎮興國界賊不敢犯洪武初聘主考試以老辭二子克壯克勤皆以縣佐得名 縣志

蕭顯聞泰和人至正間以茂異徵授星子縣學教諭尋兵  
 興監州達正道命集義兵控制州南三鄉與清江簿楊  
 介協謀守禦盡出私帑給軍三鄉之民以安州上其事  
 省府檄顯聞為安福州同知弟繩武永新州判

縣志

卷四十一終

吉安府志卷四十二

人物志

庶官二 自洪武起至正統止

明

羅復仁 李克真 戴安 王佑 楊卓

徐江 馬逮 羅宗良 劉伯符 許洪

歐陽韶 梁伯興 李亨 劉仲啟 艾彭

劉穀 彭京 陳灌 陳繼先 羅性

張嘉 劉伯完 宋琮 劉子敏 朱吾進

胡子祺 王希禮 彭豫 劉煥 周靜

尹平 歐陽銘 劉亨 阮友彰 劉季道

劉仕猷 王伯貞 周 渠 廖 欽 高 漸

李 撫附子龍同仁 劉 夏 楊起子 周 鳴

梁 潛 蕭 翀 陳 誠 鄧時俊 尹昌隆

陳彥強 楊 清 王復元附弟姚與成附曾徐 均

廖 持 鄒 緝 王處敬 康彥民 康旭明

陳景行 江仲隆 曾邦榮 王鼎亨 郭士道

鄒 佑 劉 蚪 賴進德 邱 幹 王思謨

謝兌軒 陳一敬 彭仲恭 趙 哲 李德善

蕭用道 王 潛 劉 銘 李 湘 田南畝

彭彥彬 劉 恕 彭汝器 周彥奇 宋子環

王 詢 張景良 陳士啟 周 源 曾 鼎

蕭 寬 陳 衡 李昌祺 蕭省身 劉叔斌

王芳孫 張宗璉 陳伯恭 劉 咸 陳 賞

郭 循 陳正倫 周復則 王守貞 王 昭

劉禮讓 王 雅 劉 祉 周 皞 劉良驥

陳彛訓 傅 球 李 春 歐陽和 尹崇高

宋原端 陳 禮 彭 勗 孫 鼎 楊 黻

廖 謨 劉致隆 周 叙 劉 儼 彭 琉

曾 泉 歐陽哲 萬 節 劉 綱附蕭王瀘淵

王 彥 李 毅 李九疇 羅敏淵 蕭 常

王貴莊 王 讓 胡 幾 張叔豫 江志昂

李 銓 周仲舉 楊 瑒 劉迪成 彭汝弼

言安府志 卷四十一 明庶官 二

王	劉	尹	曾	鄧	王	楊	劉	嚴	李
理	玘	禮	相	貴	孟常	季安	垕	頤	信圭
	會	劉	梁	李	<small>附弟</small> 蕭孟忠	劉	劉	江	鍾
	蒙	善	蔡	茂	陳	實	儁	玉	復
	簡	慶	蕭	劉	方	劉	劉	琳	陳
	楊	周	翼	斌	彭	益	劉	劉	永
	渙	鐸	劉	路	廣	張	清	敦	王
	羅	劉	錯	璧	劉	承	黃	劉	佐
	俊	曦	項	尹	吳	翰	璣	嘉	羅
	胡	左	裴	恕	節	周	訓	會	仲
	經	鼎						萬	本

明

羅復仁吉水人少嗜學陳友諒辟為編修已知其無成遁去謁太祖於九江留置左右從戰鄱陽齋蠟書諭降江西未下諸郡授中書諮議從圍武昌太祖欲招陳理降以復仁故友諒臣也遣入城諭且曰理若來不失富貴復仁頓首曰如陳氏遺孤得保首領俾臣不食言於異日臣死不憾太祖曰汝行吾不汝誤也復仁至城下號慟者竟日理縋之入見理大哭陳太祖意且曰大兵所向皆摧不降且屠城中民何罪理聽其言遂率官屬出降遷國子助教以老特賜乘小車出入每宴見賜坐飲食已復使擴廓前使多拘留復仁議論慷慨獨得還洪武元年擢編修復偕主事張福往諭安南還占城侵地

安南奉詔遺復仁金貝土產甚厚悉却不受帝聞而賢之三年置宏文館以復仁為學士與劉基同位在帝前率意陳得失嘗操南音帝顧喜其質直呼為老實羅而不名間幸其舍負郭窮巷復仁方墜壁急呼其妻抱杙以坐帝帝曰賢士豈宜居此遂賜第城中天壽節製水龍吟一闕以獻帝悅厚賜之尋乞致仕陸辭賜大布衣題詩衣襟上褒美之已又召至京師奏減江西秋糧報可留三月賜玉帶鐵拄杖坐墩裘馬食具遣還以壽終

明文

李克真廬陵人博涉書史敦行孝友明初鄧大將軍愈南征聞其名薦授兩淮都轉運使場官改真定藁城縣丞

境內蝗為文告城隍神蝗息轉丞真定縣病免歸結茅雲溪嘗作神石銘詳雜志子湛字孟昭亦以文學稱洪武初司訓南昌永樂中徵入文淵閣與修大典成宴賚有加遷石埭教諭改無錫無錫俗浮華湛化導漸趨於實

戴安字伯寧永豐人洪武鄉舉高才博學有用世之志三應徵辟所陳奏皆國家至計上多採納以親老乞身終養十三年復召授御史臺都事改翰林典籍復建言十二事改廣海北提舉卒於官

通志

通志按云戴安舊志俱不載今采聶貞襄梅溪戴氏族譜序補



王佑字子啟泰和人沂弟與胡子祺同時為廣西僉事按察使尋適嘗咨兩人以政體子祺曰刑新國用輕典宜靜以蒞之佑曰蠻方之人瀆倫傷化不及此時明禮法示勸懲後難治適從之廣西稱治蜀平佑徙知重慶州招徠撫輯甚得民和坐事免官卒所著有長江萬里集

參通志

楊卓字自立泰和人洪武進士授吏部主事踰年遷廣東行省員外郎田家婦行山中遇雨伐木卒欲亂之婦不從遂殺婦婦家得屍訴參政拷同役者二十人皆引服卓曰殺一婦安用二十卒乎列二十人庭下熟視久之指兩卒曰殺人者汝也兩卒大驚服罪參政曰員外何

以知之卓曰卒二十必善惡異也二十人遇一婦亂且不能況殺之乎參政曰善遂生十八人坐事謫鳳陽屯種召為禮部主事改杭州通判卓未至杭時有兄弟爭田累歲不決卓至垂涕不欲訊兄竟讓弟田卓精吏事吏不能欺而為治尚寬恕民悅服焉病免卒

通志

徐江字伯澄永豐人元至元登科避亂不仕洪武初以徵聘授深澤縣丞改洛川陞褒城令創城池剔奸蠹捕鉅寇賑饑民時兵荒之後流移者衆江捐俸設義田督民耕種漸以復業延師儒課以詩書民駸駸向學尋以疾去褒人為立生祠

縣志

馬遠字伯忠吉水人洪武間赴舉不第次年召復吏部授

辰溪縣丞陞曹縣知縣築隄防水民得其惠立祠祀之  
縣志

羅宗良字彛仲廬陵人洪武庚戌恩貢行篤學富郡僚聞  
之太守適府庠無師太守遂薦於朝下選曹議允召試  
丞相府授本郡教授新增

劉伯符以字行吉水人洪武初以明經舉授陝西永壽知  
縣民苦水渴乃從旁縣濬泉以利民尋擢大理寺丞卒  
於官

許洪字彥章廬陵人一作吉水洪武間以明經舉授橫江衛知  
事改英武衛除浙江中書省檢校性英敏所至長官皆  
欽其才事有難理者咸委洪決焉嘗市書籍筆墨試諸

生第其高下而與之性孝友一門之內怡怡如也年三  
十六即以養親歸以上縣志

歐陽韶字子韶永新人洪武初授監察御史時太祖威斷  
莫測日命御史二人侍班刑賞有失中不諫正者罪之  
一日子韶侍班上乘怒將戮一人他御史不敢前子韶  
趨跪闕廷倉卒不能措辭舉手加額連呼曰陛下不可  
上察其樸實天顏為霽其人得從輕典後乞致仕終於  
家通志

梁伯興永豐人洪武初以明經舉除真定府同知善政著  
聞陞應天府丞改知梧州府後召至京查理刑科事嘗  
命撰日本國詔稱旨陞河南右布政使通志

李亨字觀泰吉水人洪武初以人才舉授磨勘司丞陞司  
令官至蘇州府知府以父艱去太祖遣使勅諭之曰爾  
李亨曩職諸司並不見贓私以干憲章特賜糧米五十  
石鈔二百五十錠為守服之用

縣志參通志

劉仲啟泰和人洪武初徵授陝州判官始至吏猾政梗剔  
其尤者痛治之俗信鬼公署旁有召公祠常夜見四美  
婦持燭出入民爭相禱祀仲啟察其蹤得二狐於祠前  
塔下立殺之又見祠旁池蓮鮮媚翦除之池水盡赤白  
是無為妖者

縣志

艾鈇字伯崇吉水人洪武初以儒士授潮州同知擢東昌  
知府潮人感其惠愛嘗立主侑祀於韓公廟守東昌築  
隄捍江自黑龍渦至魏家灣六十里民獲安居

按通志彭著有艾陵餘音集潮陽集漢川集

劉穀字原實龍泉人

一作泰和

洪武初以教授被徵入見是日

有星象文明之祥除監察御史屢上封事皆見納以疾  
告歸起授無為州知州除水面錢均夫差門無私謁

彭京字伯圻安福人洪武初以薦辟任給事中陞真定知  
府有政聲令忌其嚴誣以私疏上察其寃坐令以死調  
京為河南僉事善草書得懷素筆法

以上通志

陳灌字子將廬陵人元末世將亂環所居築場種樹人莫  
能測後十年盜蠡起灌率武勇結屯林中盜不敢入一  
鄉賴以全太祖平武昌灌詣軍門謁見與語奇之擢湖

廣行省員外郎累遷大都督府經歷從大將軍徐達北  
 征尋命築城秦州工竣除寧國知府時天下初定民棄  
 詩書久灌建學舍延師選俊秀子弟受業訪問疾苦禁  
 豪右兼并創戶帖以便稽民帝取為式頒行天下伐石  
 築隄作水門蓄洩護瀕江田百姓咸賴有坐盜麥舟者  
 論死數十人灌復按曰舟自漂至而愚民闕取之非謀  
 劫也坐其首一人餘悉減死灌丰裁嚴正而為治寬恤  
 類此洪武四年召入京病卒 明史

陳繼先字仲述秦和人洪武進士授御史時決獄者多弗  
 稱旨獨繼先所訊得情憲臺章疏奏覈皆出其手暇輒  
 為文自娛一時稱為陳古文而不名卒於官所著有橋

梓前集

縣志

羅性字子理秦和人洪武初舉於鄉授德安同知大盜糟  
 李萬戶者捕久不獲株連繫獄者數百人性至郡有指  
 糟李死者性辯其非是答逐之悉出所繫與期十日得  
 糟李即盡貸若曹衆叩頭願盡力七日果得糟李嘗治  
 蔬圃得窖鐵萬餘斤會方賦鐵造軍器民爭求售性曰  
 此天所以濟民也悉以克賦秩滿赴京坐擅用棗水染  
 軍衣謫戍西安四方老師宿儒在西安者數十人吳人  
 鄒奕曰合吾輩所讀書庶幾羅先生之半年七十卒 通志

張嘉字安禮吉水人治五經博通子史以古文著名洪武  
 初薦至京召見賜對授河南鄧州學正嘗主廣東鄉試

人服其公 縣志

劉伯完字觀靜吉水人洪武初舉茂才通占卜課候術數之學里中何監正奇其技薦於御史臺劉璉值朝廷雅重天文諸儒詔授陰陽學正歷欽天監兼回回監副迨靖難兵起遂變姓名遠遁後不知其所終

宋琮泰和人洪武中會試第一北士無與者琮善易學悵然語人曰翰苑當有厄吾其竄乎既而諸生上言劉三吾白信蹈等南人私其鄉帝怒命侍講張信等覆閱不稱旨有言信等故以陋卷呈由三五等屬之也帝益怒信蹈等論死三吾以老戍邊琮亦遣戍帝親策問更試擢六十一人皆北士時謂之南北榜又曰春夏榜云永

樂初赦還起刑部檢校鄉人楊士奇輩貴顯琮無所攀援宣德中以檢討掌助教事卒之前預尅死期或叩以休咎輒不應

劉子敏名祿泰和人洪武間拜監察御史歷官廣東副使有學識鯁亮無阿百折不挫 以上通志

按子敏縣志失載今據通志府志補登

朱吾進吉水人洪武初舉人材授浙江衛知事改燕山衛

致仕歸賜勅褒嘉 參府志

胡子祺名壽昌以字行吉水人宋資政殿學士銓十世孫陳友諒陷吉安明太祖遣兵復之將殺脅從者千餘人子祺走謁帥力言不可得免洪武三年以文學授監察

御史止書請都關中帝稱善遣太子巡視陝西後以太  
子薨不果子祺出為廣西按察司僉事屢平冤獄祠廟  
不載祀典者悉撤毀改知彭州都江諸堰秦守李冰所  
鑿導江水灌成都田歷代皆用鐵石修之勞費不貲元  
季兵興堰廢田不治子祺議以竹木代工甚省遷延平  
知府踰年卒次子廣自有傳明史參通志

王希禮吉安人洪武中知平陽不事綜刻催科讞決葺鞭  
示朴常曰刑者輔政之法不得已用之民自化服  
彭豫字與志泰和人洪武中為香山丞地僻俗囂前令率  
尚威嚴豫至寬教令省刑罰廢墜具舉流亡來歸海濱  
屯帥暴橫悉遣還教民樹柵積石以禦倭寇寇不敢近

益蓄蠱毒豫廉得之誅徙其家後莫有犯者卒於官通志

劉煥字孟章吉水人洪武初以明經舉授河南原武知縣  
上書首陳時務禁民掘塚時適祭無祀鬼神有犬搖首  
而前叱逐不去乃命左右隨之至蒿野中見二人掘塚  
獲而訊之伏罪後以薦擢吏部郎中卒於官人物志

周靜安福人洪武初舉學行授鈔庫提舉以亢直謫戍畢  
節居夸十八年益厲節操適詔選老成人諭榜葛刺國  
起授行人持節往淹留七載始遣陪臣伴歸至湖陽卒  
所著有滇南集通志

尹平字伯洪吉水人少英俊有大志洪武初應詔至京太

古史序記 卷四十二  
祖試以大明一統詩復試禮部授考功監丞改刑科給事中又改浙江道監察御史被命湖廣詢察民隱斷決囚罪考察官吏所至率見風采竟以事卒於獄後以子貴贈翰林編修 縣志

歐陽銘字日新泰和人以賢才薦除江都縣丞兵燹之餘民死徙十七八銘招徠拊循漸次復業民有繼母告其子不孝者呼至委曲開譬母子泣謝去遷知臨淄縣副將軍常遇春過臨淄卒入民家取酒相毆擊一市盡譁銘笞而遣之卒訴令罵將軍將軍召詰之銘曰卒王師民亦王民也民毆且死卒不當笞邪將軍意解為責軍士以謝已而大將軍徐達至軍士相戒曰是嘗抗常公

健吏也毋犯銘為治廉靜平恕暇輒進諸生講文藝或單騎行田間視民耕穫勤惰勸勵之邑大治秩滿入覲卒

通志按云歐陽銘林志失載王文端公集亦有傳與此畧同

劉亨字嘉會廬陵人洪武中舉經明行修說書於華蓋殿以言事忤執政出為壽州訓導嘗上言文武並用之道陞武進縣丞縣民李德懋等作亂亨謀於守令擒首惡戮之而諭降其黨事聞賚金幣旋以事罷歸宣德中復以薦入朝自言年將八十不足任事聽還鄉自便又數年卒所著有竹軒寫心二集隨寓錄凡若干卷

阮友彰廬陵人洪武初官福建按察使以廉幹稱左遷河南尋謫戍復起為交趾副使交趾久違聲教甫內屬友彰至未三月政令大行

劉季道

一作通

吉水人洪武中為起居注首發御史大夫陳

寧奸狀嘗侍東宮閱書東宮方視楊太真畫像季道手裂之隨駕幸中都上賦清流關詩命和季道援筆立就有治定不教生縱逸功成猶遣厯間關之句上嘆賞曰此詩有安不忘危之意賜白金文綺陞浙江按察司僉事發摘陰伏機敏如神尋以剛直忤權貴下獄死

劉仕貺字伯貞安福人父開開兄聞弟閱閏皆以春秋應舉為元官獨開不仕著書終其身仕貺少受父學紅巾

亂避地邑南社洲洪武十五年應賢良舉授廣東按察司僉事分司瓊州州在海外民夷錯居俗獷悍不可繩以法且善蠱上官至輒致所產珍貨為贄受則喜以為無猜嫌不受則懼禍蠱殺之仕瓊者悉為所汙仕貺廉且惠愛輕徭理枉大得民和雖卻其贄夷人不忍害也朝議省僉事官改授東莞河泊使發憤得疾遭風歿於

水

以上通志

王伯貞泰和人沂子以經術顯洪武十五年聘至京師應詔者五百餘人帝親御奉天門試之伯貞對第一授試僉事分巡廣東雷州復呂塘廢渠清鹽法會罷分巡官召還為戶部主事命尚書趙俊受學以父喪服闋不時



起謫居安慶者數年建文初復以薦知瓊州府岷州黎相仇殺以反聞且用兵伯貞捕其首惡數人兵遂罷瓊田歲常三穫以賦軍軍不時受俟民乏而歛急則因之以要利伯貞為立期三輸之而弊絕居數年大治流民來歸者萬三千餘口憂歸補肇慶未之官卒 明史

周槩

一作

字仲方吉水人洪武鄉舉為翰林侍從事必師

古出為中牟令有異政遷台州同知謫於戎伍廬陵李

昌祺自陳有志經學願得槩為師起為廬陵司訓夏原

吉薦同治水蘇松磚石不給命拆塙為之中有碑云此

塔逢周破以經義治水有聲

通志

廖欽河內丞吉水人並以廉能稱居八年調吳江後坐事

謫戍久之以老病放歸道河內河內民爭持羊酒為壽

且遺之縑須臾哀數百匹欽固辭不得一夕遯去

明史

按舊志廖欽字敬先自幼穎敏日記數千百言洪武

初召試京師以才學優等授內鄉縣丞民懷其惠改

吳江縣縣有舊堤護田數千頃為水所廢勢家爭奪

事聞於朝命官修築同僚難其事以任欽欽計工費

召民從事且諭曰堤成爾亨利不成我甘謹民感其

言不日堤成既而致仕起袁州教授典粵試永樂詔

修太祖實錄除翰林檢討卒

高漸字以正吉水人父鉅字文海元季舉義兵復吉水與

賊戰於鄉兵敗死之漸四歲而孤母曾氏守節自誓教

育十餘年為陳友諒兵所執後得脫辛苦供母師事解  
開於鄉學洪武八年貢京師入國學分教山西安邑縣  
還拜監察御史日侍遊宴遇事輒諫大臣皆嚴憚之未  
幾以母老乞終養歸永樂初召拜監察御史左遷黃陂  
尉卒於官

李樞字伯謙吉水人洪武庚戌以明經舉授鳳陽同知時  
鳳陽陞為中都事繁甚樞外靜內敏僚屬咸服穎州旱  
樞按災救荒令民自植木於田書畝分以俟覆覈成冊  
以聞得蠲租會營宮殿城樓儲粟鉅萬衆一推樞任其  
事有監納黠吏芮某者易樞書生樞召立廷下取簿籍  
更為條目相關出入皆出芮意表芮股栗請死乞更新

乃救之以老賜致仕無疾而逝子彥宣號拙菴永樂癸  
未以材德舉授禮科給事中

龍同仁字子元永新人元至正鄉舉洪武間縣令烏斯道  
重其學行薦之朝授學訓導以上縣志

劉夏字簡卿安福人洪武改元以徵起授尚賓館副使上  
書陳時務五十條又撰皇王太學旨要一書疏進尋因  
大旱求直言應詔言二事洪武二年差往汴陝訪採前  
代政績筆削成書以獻三年差赴交趾竣事還歿於南  
寧府井龍縣官歸其喪有文集行世縣志參通志

按劉迪簡通志作劉夏安福志則迪簡夏初立兩傳  
官階事實皆同當是一人今參通志刪夏初傳歸此

又通志按云林志作劉迪簡登科考迪簡乃洪武三十年進士吉水人故從安志改作夏今查白志選舉劉迪簡係建文二年進士亦於所按不合覆查舊府志亦作劉迪簡而無劉夏初安福選舉志仍兩名並存而夏名多一初字又註府志作士彊查士彊本傳與此傳事實迥異尤訛之甚者謝志既照安志作劉夏今仍從之

楊起予字賓素泰和人洪武鄉舉救免會試為黃陂令清介自守有惠政以考績卒於京黃陂民有祀於家者縣志周鳴字岐鳳吉水人洪武中以經明行修薦為桐城訓導改即墨簿會軍興賦鐵七十餘萬鳴具言海隅非產鐵

之地民力用甦永樂初授國子學正擢漢府紀善王開寶賢堂招致匪人為奪嫡計鳴作寶賢堂箴寓規諷意王忌之送鳴於京師下錦衣獄仁宗時以太子監國知其以諫得罪改長洲儒學遷國子博士仕終職方員外郎著有詩學梯航若干卷分省人物考

梁潛字用之泰和人洪武間舉鄉試授四川蒼溪訓導以薦除廣東四會知縣縣有龍橋河吏廉平則河水清自潛至迄去水可鑑永樂元年召修太祖實錄書成擢翰林修撰賜白金襲衣文幣兼右春坊右贊善代鄭賜總裁永樂大典通志

通志按云梁潛榜姓鍾後復本姓為梁人物志既載

梁潛又載鍾潛白志考正存其一又按仁宗為太子監國時潛居輔導後以讒死所著有泊菴集

蕭翀字鵬舉以字行泰和人洪武間以賢良應制賦指佞草詩稱旨授蘇州同知山東鹽運副使以勤儉廉介稱為劉崧弟子編其師集以傳後以子鎡貴贈太子太師

縣志

縣志按云舊志載鵬舉孝友事詳藝文志劉崧五荆傳又按通志謂蕭翀事林志與人物志畧同皆不及其兄弟而職方集所撰五荆傳則稱其同祖五人長曰翀次翬次殊次璉次暉一門孝友致紫荆五幹之瑞顧不及翀之宦蹟疑為別有一人不知子高作傳

時翀尚未仕惡得有宦蹟哉今考宏治志稱鵬舉以賢良徵授蘇州府同知勤儉廉介後為山東鹽運副使禦寒惟一緼袍詹事府丞陸中善使山東還語於朝曰蕭運副潔清正直為山東第一惜老矣未幾卒於官有詩集藏於家

陳誠字子魯吉水人洪武進士初授行人司出使安南諭蠻却其餽送銀幣復命陞翰林檢討建文朝出為廣東叅議永樂初謫居撫州踰年起為吏部主事晉員外郎時西域撒馬兒罕哈烈等國皆遣使入貢命誠往報撰西域志上之陞本司郎中累官布政使叅政凡三使西番皆不辱命洪熙中以老告歸所著有竹山集

竹山自記

三才圖會 卷四十一  
陳誠事蹟林志及吉州人文紀皆畧白志改撰  
鄧時俊字仲清永豐人洪武進士任刑科給事中以直諫  
出為驛丞者再後召入與修大典陞考功司主事出補

衢州通判卒 縣志

尹昌隆字彥謙泰和人洪武中進士及第授修撰改監察  
御史惠帝初即位視朝晏昌隆疏諫曰高皇帝鷄鳴而  
起昧爽而朝未日出而臨百官故能庶績咸熙天下以  
安陛下嗣守大業宜追繩祖武兢兢業業憂勤萬幾今  
乃即於晏安日上數刻猶未臨朝羣臣宿衛疲於伺候  
曠職廢業上下懈弛播之天下傳之四裔非社稷福也  
帝曰昌隆言切直禮部其宣示天下使知朕過未幾以

地震上言謫福寧知縣燕兵既逼昌隆以北來奏章動  
引周公輔成王為詞勸帝罷兵許王入朝設有蹉跌便  
舉位讓之若沉吟不斷進退失據將求為丹徒布衣且  
不可得成祖入京師昌隆名在奸臣中以前奏貸死命  
傳世子於北平永樂二年冊世子為皇太子擢昌隆左  
春坊左中允隨事匡諫太子甚重之解縉之黜同日改  
昌隆禮部主事尚書呂震方用事性刻忮當其獨處精  
思以手指刮眉尾則必有密謀深計官屬相戒無敢白  
事者昌隆前白事震怒不應移時又白之震愈怒拂衣  
起昌隆退白太子取令旨行之震大怒奏昌隆假託宮  
僚陰欲樹結潛蓄無君心逮下獄尋遇赦復官父憂起

復謁震溫言接之入理前奏復下錦衣衛獄籍其家帝  
凡巡幸下詔獄者率與以從謂之隨駕重囚昌隆與焉  
後數年谷王謀反事發以王前奏昌隆為長史坐以同  
謀詔公卿雜問昌隆辯不已震折之獄具置極刑死夷  
其族後震病且死號呼尹相言見昌隆守欲殺之云明史  
按萬曆志昌隆為御史時巡按閩中劾貪吏理冤獄  
風紀肅然還朝上疏四事節民力謹嗜慾勤政治務  
正學不報既而京師地震又上疏言陰盛陽微奸臣  
專政所致廷臣憾之黜知福寧縣坐中使誣兇詛下  
獄永樂初改北平按察知事時皇嗣未立武臣有言  
漢王有扈從功者上猶豫驛召昌隆至叩首曰長嫡

承統萬世常經由是仁宗得為皇太子進昌隆中允  
竟因漢王讒黜為禮部主事及谷王謀逆事覺震陰  
令女習昌隆字雜獄詞中誣昌隆與同謀坐棄市後  
震死仁宗聞之曰是曾殺朕師者訪昌隆子得灝命  
大學士楊士奇字之賜御馬遣歸於是冤狀得暴  
陳彥強泰和人以文學薦為麻陽縣丞縣雜徭最為難  
治彥強操持廉潔民敬信之逃竄山谷者還集三百餘  
戶俗少知學彥強身為之師講學諭道於是始有明經  
領薦者

楊清字子肅泰和人洪武時以舉授松江府知事上使  
下一以誠意人不忍欺之三年遷福建鹽運使知事服

食一如布衣時操守廉潔不務為名所著有溪園餘閒錄宦游錄

王復元字子復泰和人洪武鄉舉試禮部授化州學正陞北監博士剗削鋒銳務為和易預修五經性理大全諸書所著文集若干卷弟敬先為宜章訓導陞岳池教諭化導誘掖所至政績懋著

姚與成泰和人七歲時鄉長者曾命對曰階前文武花初發即應聲云山上君臣藥已生年十九與同里曾克偉同舉於鄉尋登第與成授戶部主事出按直隸諸郡有廉能聲歸奏對稱旨卒年二十七克偉任御史按湖廣福建山東浙江遼東等處風聲焯焯以事謫戍用薦復起為刑部員外郎丁憂奪情起復授龍州同知歲餘援例歸朝未行而卒

泰和志按云宏治志與成從子瀚字思寬博學多才歷官雲南按察經歷著有鶴巢詩文集

徐均吉水人洪武時貢太學任肇慶陽春主簿陽春故春州為瘴鄉使者按行多避去縣豪得雄據為姦均廉知之吏白應往視莫大老均叱曰若化外耶抑民伍也亟走來見且出雙劍示之大老聞恐懼乘板輿至叱使下拜熟視諭遣之陰伺其語有異而府符適下遂繫之獄料其黨必且來刦戒吏士操鼓角棚其內衙自帶劍挾弓矢披甲長嘯大老三子果以衆來聞之皆惴莫敢前

詰朝昇兩大瓜安石榴數十枚致饋剖之皆黃金大珠也均麾出械繫大老送府後以賂得脫仍數致前所饋均嚴拒欲捕治之大老求府符調攝陽江縣事

廖持字敬已吉水人與兄敬存自相師友攻苦力學並有

文名以徵辟入成均中洪武丁卯應天鄉試授山西隰

州同知政務釐剔吏服民懷在太學時與同舍生侯庸

歷事內府發其奸狀庸憤之及為隰州考滿至京庸方

官少宰持入謁長揖不拜庸以夙忿誣其舉力士不中

下之獄不食死

以上縣志

鄒緝字仲熙吉水人洪武中舉明經授星子教諭建文時

入為國子助教成祖即位擢翰林侍講立東宮兼左中

允屢署國子監事永樂十九年三殿災詔求直言緝上

疏曰陛下肇建北京焦勞聖慮幾二十年工大費繁調

度甚廣冗官蠶食耗費國儲工作之夫動以百萬終歲

供役不得躬親田畝以事力作猶且征求無藝至伐桑

棗以供薪剝桑皮以為楮加之官吏橫征日甚一日即

如前歲買辦顏料本非土產動科千百民相率斂鈔購

之他所大青一斤價至萬六千貫及進納又多留難往

復展轉當須二萬貫鈔而不足供一柱之用其後既遣

官采之產所而買辦猶未止蓋緣工匠多派牟利而不

顧民艱至此夫京師天下根本人民安則京師安京師

安則國本固而天下安自營建以來工匠小人假託威



勢驅迫移徙號令方施廬舍已壞孤兒寡婦哭泣叫號倉皇暴露莫知所適遷徙甫定又復驅令他徙至有三四徙不得息者及其既去而所空之地經月逾時工猶未及此陛下所不知而人民疾怨者也貪官污吏徧布內外剝皮及於骨髓朝廷每遣一人即是其人養活之計虐取苛求初無限量有司承奉惟恐不及間有廉彊自守不事干媚者輒肆讒毀動得罪譴無以自明是以使者所至有司公行貨賂剝下媚上有同交易夫小民所積幾何而內外上下誅求如此今山東河南山西陝西水旱相仍民至剝樹皮掘草根以食老幼流移顛踣道路賣妻鬻子以求苟活而京師聚集僧道萬餘人日

耗廩米百餘石此奪民食以養無用也至報効軍士朝廷厚與糧賜及使就役乃驕傲橫恣閑遊往來此皆姦詭之人懼還原伍假此規避非真有報効之心也朝廷歲令天下織錦鑄錢遣內官買馬外蕃所出常數千萬而所取曾不能一二馬至雖多類皆駑下責民牧養騷擾殊甚及至死傷輒令賠補馬戶貧困更鬻妻子此尤害之大者漠北降人賜居室盛供帳意欲招其同類也不知來者皆懷窺覘非真遠慕王化甘去鄉土宜於來朝之後遣歸本國不必留為後日子孫患至宮觀禱祠之事有國者所當深戒古人有言淫祀無福况事無益以害有益蠹財妄費者乎凡此數事皆下失民心上違

天意怨讟之興實由於此夫奉天殿者所以朝羣臣發號令古所謂明堂也而災首及焉非常之變也非省躬責己大布恩澤改革政化疏滌天下窮困之人不能回上天譴怒前有監生生員以單丁告乞侍親因而獲罪遣戍者此實有虧治體近者大赦法司執滯常條當赦者尚復拘繫並乞重加湔洗蠲除租賦一切勿征有司一官全其廩祿拔簡賢才申行薦舉官吏貪贓蠹政者覈其罪而罷黜之則人心歡悅和氣可臻所以保安宗社為國家千萬年無窮之基莫有大於此者矣且國家所恃以久長者惟天命人心而天命常視人心為去留今天意如此不宜勞民當還都南京奉謁陵廟告以災

變之故保養聖躬休息於無為毋聽小人之言復有所興作以誤陛下於後也書奏不省時三殿初成帝方以定都詔天下忽罹火災頗懼下詔求直言及言者多斥時政帝不懌而大臣復希旨詆言者帝於是發怒謂言事者謗訕下詔嚴禁之犯者不赦侍讀李時勉侍講羅汝敬俱下獄御史鄭維桓何忠羅通徐璠給事中柯暹俱左官交趾惟緝與主事高公望庶吉士楊復得無罪是年冬緝進右庶子兼侍講明年九月卒於官緝博極羣書居官勤慎清操如寒士子循宣德中為翰林待詔請贈父母帝諭吏部曰曩皇祖征沙漠朕守北京緝在左右陳說皆正道良臣也其予之

明史

王處敬廬陵人洪武中官至湖廣僉事謫交趾尋復原職  
平生剛毅與人不苟合至老不渝 通志

康彥民號恣窗泰和人洪武進士四令壯邑皆著賢聲初

宰青田改儀真巴陵以憂歸服除補天台政尚教化勸

民務本力農著有諭士民書萬餘言告歸家居二十年

宣德初巡按御史至天台邑民言彥民公廉有為乞復

召為縣御史以聞遂再涖台治狀為浙中第一中蜚語

謫江寧縣丞卒諸縣各祠名宦 通志

按明史彥民附見高斗南傳云彥民先知青田調儀

真後歷巴陵天台並著名蹟永樂初罷歸洪熙元年

御史巡按至天台縣民二百餘人言彥民廉公有為

乞還之天台慰民望御史以聞宣宗嘆曰彥民去天

台二十餘年民猶思之其有善政可知乃用為江寧

縣丞視通志較詳然本傳以為再涖天台中蜚語謫

丞良是疑史有訛因附錄正之

康旭明安福人洪武間授戶部照磨文移駁勘不少阿附

復言御史怙寵請命大臣顧佐等簡覈之宣廟書其名

於殿柱將大用以疾歸邑政缺失知無不言里人有以

私干蕭某者特往止之蕭亦竦服

陳景行字貫偉永豐人洪武間以儒士應制召問經史時

務策條對稱旨為改名晦欽除江陰縣丞署縣事吏肅

民安文學之士尤多所成就陞浙江道監察御史尋以

疾卒官

江仲隆永豐人洪武中應聘為吉郡學正起拜監察御史遷瀋府紀善在任三十年敬慎自持未嘗易其素守致仕歸年八十餘

曾邦榮永豐人洪武鄉舉授給事中陳上微行忤旨去其二齒謫崖州巡檢

王鼎亨廬陵人洪武中以明經授知揚州時州民梗而狡鼎亨廉其豪者治之州遂稱治改湖安陸蒲等州持重廉謹卒於官著有石邱遺稿

郭士道一作仕萬安人洪武中太祖閱其試卷稱善賜特榜進士授行人時齊府缺輔導官士道以讜直奉詔有欲

以青州危社稷者士道馳奏寢其事遷襄城縣丞轉懷府通判所至以能稱永樂時擢順天府尹時郡內人民凋敝士道撫輯之三年歿於官祀鄉賢

鄒佑初名位永寧人洪武間以貢士為序班聲響亮如洪鐘太祖奇之召對試治安策五稱旨御筆更今名授廣東監察御史蹇諤有風裁不避權勢所至斥蠹摘奸陞廣東按察副使吏不忍欺民誦其廉祀鄉賢

劉通志名虬字公潛永豐人洪武進士授行人陞漢州知州調鬱林州皆有惠政兩為會試考官陞湖廣提學僉事訓迪裁成大振風教秩滿乞休歸

賴進德萬安人洪武鄉舉授湖廣寶慶知事陞鳳翔推官

一日有婦人橫道負囊而行狀惶遽執解其囊則金也  
訊之婦曰主受枉成獄藉是免死耳德訊治果冤遂釋  
其罪所著有李杜詩解三卷草廬集

邱幹字子強永豐人洪武初以孝弟力田應詔任浙江餘  
杭縣丞簡重有威吏胥無敢虐鄉民者尋陞知縣以祖  
老乞歸

王思謨安福人問學該博明初任御史侃侃有大節著風  
憲論極言懲革大政以抗直死以上縣志

謝兌軒字所芳安福人今隸蓮花廳洪武貢生授臨江路  
學正課士維嚴好獎進後學廳志

陳一敬泰和人幼與楊士奇同學於陳謨由薦舉為賀縣  
丞有惠政以直同僚冤坐罪歸

彭仲恭龍泉人洪武間任英山縣丞陞知永城縣改知陳  
州項城民貸官粟三千石牛二百八十頭不能償奏蠲  
之永樂庚寅黃河水溢蕩析官宇民廬仲恭集百艘載  
公廩之儲及民老稚不能自移者請蠲糧稅又請徙縣  
治於新蔡上蔡汝陽空地許之甲午征沙漠仲恭部民  
運餉軍需勞午民感其惠未有一人亡去者上特賜楮  
幣秩滿遷金吾衛經歷以母憂歸項城士民立石頌之  
祀鄉賢

趙哲字用哲吉水人洪武鄉舉教諭梁山興廢振靡士風  
頓起以憂歸服除改廣東徐聞永樂元年入京朝臣欲

吉安府志 卷四十二  
薦留之堅辭歸尋卒

以上縣志

李德善字汝周安福人洪武間以薦任成都府司訓擢常州知府有江陰民二十餘人以鬻鹽繫獄因首犯未獲久不決德善諭而縱之仍令誘為首者出眾皆感激果引首犯至即決遣之常人稱頌新增

蕭用道泰和人岐子建文中舉懷才抱德詣闕試文章擢靖江王長史召入翰林修類要燕師渡淮與周是修同上書指斥用事者永樂初預修太祖實錄改右長史從王之藩桂林作端禮體仁遵義廣智四門箴以獻後以疾乞歸卒於家 通志

泰和志按云楊東里集用道初名遵字用道後以字行遂別字坦行吉安知府朱仲智舉送京師

王潛字澄淵安福人建文間鄉舉歷任梓潼知縣祿勸知州荊州府同知所至清操自勵有惠政俸餘輒以濟人雅善楊士奇士奇作咏梅詩以况其清標所著有南野集備忘錄年九十六卒 縣志

劉銘字日新龍泉人由貢生授廣西梧州通判攝藤縣有殺繼母陳氏子者以賄久不決引問之日一蛇來庭下首俯仰若告訴狀驅之不去銘曰此必繼母之精倚附求伸我不令爾枉死也蛇乃低首去乙酉瓊州黎民不靖奉命招服之即遷瓊州知府祀鄉賢 縣志

李湘字永懷泰和人永樂中由國子生理刑都察院以才

擢東平知州常祿外一無所取訓誡吏民若家人然城東有大村壩源出岱嶽雨潦輒為民患奏發丁夫隄之州及所轄五邑地多荒蕪力督民墾闢公私皆實會舊官還任將解去民羣乞於朝帝從其請成祖晚年數北征令山東長吏督民轉餉道遠多死亡惟東平人無失所奸人誣湘苛斂民財訐於布政司縣民千三百人走訴巡按御史暨布按二司力白其寃者老七十人復奔伏闕下發奸人誣陷狀及布政司繫湘入都又有耆老九十人隨湘訟寃通政司以聞下刑曹閱實乃復湘官而抵奸人於法蒞州十餘年至正統元年初詔大臣舉郡守尚書胡濙以湘應遂擢懷慶知府東平民扶攜老幼泣送數十里懷慶有軍衛素挾勢厲民湘隨時裁制皆不敢犯居三年卒

明史

田南畝永豐人永樂鄉舉知奉化性資寬厚操行廉謹刑罰不妄施惟以禮訓人遘疾且殆父老入視猶問民麥食卒於官

叅通志

彭彥彬吉水人洪武中舉人才授蕭山知縣以事罷洪武三十一年復舉廉能授廣東歸善令有惠政卒於官

表叅縣志

劉恕永豐人出使古城有聲稱

彭汝器永豐人嘗預二十八人之選與修洪武實錄卒於

官詔遣禮部主事護喪歸

以上人物表

周彥奇名正以字行吉水人洪武間舉明經任直隸宣城  
 訓導永樂初授刑科給事中遷雲南僉事會麓川緬甸  
 蠻苗忿爭相仇殺彥奇匹馬深入其地宣布國威諭以  
 禍福皆解去擢大理少卿讞訟能推極幽隱以疾告歸  
 卒於家 縣志

宋子環字文瑩廬陵人 一作吉水由永樂進士為庶吉士歷考  
 功郎中從師達採木湖廣以寬厚得衆心仁宗即位授  
 梁府右長史改越府和易澹泊居兩府皆有賢聲宣德  
 中卒於官家具蕭然事聞給舟歸喪所著有詞林彙梁

園集

王詢永豐人永樂進士任韶州推官明察精敏不畏權要

時中官鄭和齎金幣勞賜海外諸番護行軍官頗橫捕  
 韶民三人以去家人呼號贖以金不許詢至舟徑取以  
 歸

張景良永新人永樂間以鄉舉授國子博士進四書直講  
 授右春坊司直郎判順慶以東宮嘗受學於景良取府  
 所斂民金五百兩遺之景良受焉悉以還前所斂之民  
 或難之曰孰若先拒可以博廉名景良謝曰斯皆吾民  
 膏脂也豈忍借是以沽廉哉 以上通志

陳士啟名雷以字行泰和人永樂二年進士選庶吉士擢  
 禮部郎中尚書呂震險忮屬吏皆憚之承奉唯謹士啟  
 獨不少徇十二年三月吏部言布按二司多缺官帝曰



布政按察吾方岳臣方數千里地懸數人手其簡廷臣  
 賢能者分別用之於是諸曹郎給事中出為監司者二  
 十餘人而士啟得山東右叅政盡心吏事不為察察名  
 督徭賦不峻期約青州饑疏請賑之粟使至饑民倍增  
 士啟復上疏先出粟予民謂使者曰有罪吾獨任廷議  
 竟從之坐唐賽兒亂下獄數月釋還職高煦謀不軌士  
 啟自青州暮馳歸語三司密聞於朝高煦既執從薛德  
 張本錄餘黨撫安人民事竣命清理山東軍籍宣德六  
 年卒於官

明史

周源字本仁吉水人占籍湖廣永樂鄉舉知天台縣時鹽  
 禁方嚴賦無所出民多流移源奏免其賦復業者四百

餘戶陞常州知府比至縱囚出外舍約期聽理無一亡  
 去者值歲大歉朝遣重臣賑濟源建白借運兌糧以濟  
 之未幾引疾歸所著有溪南集

叅通志

曾鼎字復鉉永豐人永樂間中鄉試第一尋成進士授陝  
 西僉事歷陞雲南少叅所至能持風裁肅憲紀所學無  
 所矯飾為文以發明義理為主著有詩文集若干卷  
 蕭寬字雅容吉水人永樂進士選庶吉士預修永樂大典  
 授兵部主事累官湖廣左布政使為人寬容端重未嘗  
 見其疾言遽色所至有聲

通志

陳衡字紹隆永豐人永樂辛卯進士歷巡按廣東河南陝  
 西風裁表著秩滿遂引歸布衣蔬食無一壠之植以遺

子孫薛瑄稱其清德如良玉瑩潔

縣志

李昌祺名禎以字行廬陵人永樂二年進士選庶吉士預修永樂大典僻書疑事人多就質擢禮部郎中遷廣西左布政使坐事謫役尋宥還洪熙元年起故官河南與右布政使蕭省身繩豪猾去貪殘疏滯舉廢救災恤貧數月政化大行憂歸宣宗已命侍郎魏源代而是時河南大旱廷臣以昌祺廉潔寬厚河南民懷之請起昌祺命奪喪赴官撫恤甚至正統改元上書言三事皆報可四年致仕家居二十餘年屏跡不入公府故廬裁蔽風雨伏臘不克景泰二年卒

明史

蕭省身泰和人與昌祺同舉進士洪熙元年布政考滿當

給誥命奏父年八十餘願以給父帝嘉而許之後遂為

例居河南十二年治行與昌祺等

明史合昌祺傳

劉叔恣廬陵人初為沅陵知縣縣介谿洞困徭役者悉竄

山谷叔恣至計其丁貲而役之流亡復業有爭訟不治

以法為開諭再三心服而後遣之陞北京行部員外時

新置行部兵饑之後庶務叢脞工曹尤甚叔恣以廉勤

著尋陞辰州府同知及建北京宮殿率郡民就役卒於

北京民之在役者歸時載其喪葬辰州

通志

王芳孫字瀘淵安福人官山東河南布政清慎自持璽書

褒之子高亦以進士官至福建右布政使居官四十餘

年清慎如其父人咸重之

通志

張宗璉字重器吉水人永樂二年進士改庶吉士授刑部主事錄囚廣東仁宗即位擢左中允會詔朝臣舉所知禮部郎中况鍾以宗璉名上帝問少傅楊士奇曰人皆舉外吏鍾舉京官何也對曰宗璉賢臣與侍讀學士王直將舉之不意為鍾所先耳帝喜曰鍾能知宗璉亦賢矣由是知鍾而擢宗璉南京大理丞宣德元年詔遣吏部侍郎黃宗載等十五人出釐各省軍籍宗璉往福建明年坐奏事忤旨謫常州同知朝遣御史李立理江南軍籍檄宗璉自隨立受黥軍詞多逮平民實伍宗璉數爭之立怒宗璉輒卧地乞杖曰請代百姓死免株累甚衆初宗璉使廣東務廉恕至是見立暴橫心積不平疽發背卒常州民白衣送喪者千餘人為建祠君山宗璉蒞郡不攜妻子病亟召醫室無燈燭童子從外索取油一盂入宗璉立却之其清峻如此

明史

陳伯恭永豐人永樂甲申進士授浙江道御史建言不諱謫浙江分水令居官清直能理訟獄以疾歸邑人作遺愛亭去思碑其諫疏著述甚富曾祭有詩序贈之

新增

劉咸字士皆泰和人永樂進士歷官河南按察副使改廣東時營繕北都被命董運木料卒於官文章政事俱有名於時著有河南咏古集虛庵集

陳賞字公延泰和人繼先子永樂進士擢廣西僉事守官清苦卒無以為殮同官周之始得返喪著有橋梓後集

郭循廬陵人永樂進士擢刑部主事錄囚南京于枉抑多  
所伸雪嘗論列營繕之事因改工部官至廣東叅政温  
厚詳明表裏洞徹見苛刻者每曰此輩自絕生理將以  
是徼名干祿初不知召天之譴也以上通志  
陳正倫名叙以字行吉水人永樂進士授御史巡按湖廣  
摘奸剔隱時有神御史之稱成祖親賜璽書獎之尋陞  
南陽知府屢上封章乞重租減額折銀立軍政條例於  
便處建立倉廩皆關政要時唐王府私造軍器數縱鷹  
犬擾民正倫痛加裁抑又修石堰興水利九載陞陝西  
按察司以憂去改四川尋致仕卒於家  
周復則廬陵人由太學生授大理左評事遷寺副薦為四

川左叅議信實循謹人多懷之

王守貞廬陵人永樂間由太學生授知長寧縣遷蘇州府  
推官案理明恕不事苛細遷監察御史有能名

王昭字季顯廬陵人永樂鄉舉授連州訓導以身率教遷  
梁府伴讀嘗設禮引王王賢之

劉禮讓名遜廬陵人永樂進士授刑部主事遷為郎使督  
運江淮兼理事公私無虧聽訟無微不察亦不事苛細  
宦途二十餘年清白端嚴卒於淮上以上縣志

王雅字格非吉水人德化訓導永樂間為會試房考得曾  
榮等皆知名陞司經局正字遷翰林檢討預修兩朝實  
錄性樂恬退未嘗一及貴勢之門通志

劉祉字仲戩廬陵人由郡學生入貢與修永樂大典成授  
浙江餘姚尹以言事忤旨謫景州用御史薦復職知連  
江縣有治聲

則皦字純熙廬陵人永樂鄉舉以薦授監察御史堅直無  
私阿然寬恕不以深文致人楊士奇亟稱之

劉良驥字致遠廬陵人永樂間由歲計補國子生與修大  
典成授兵部車駕主事出掌池州馬政察驗孳息之數  
奏減歲三之一故事內京官非三年無過不得與郊祀  
良驥兩與焉免官歸蔬食敝席以終

陳彝訓永豐人雅言孫永樂初由貢入太學善楷書拜中  
書舍人預修洪武實錄擢湖廣叅議歷調廣東湖廣曾

平五開蠻獠宣德間以老乞歸

傅球字謙益永豐人

一作永新

永樂鄉舉授南京刑部主事執

法明允改兵部操守益堅會修南內殿奉勅採木四川  
事集而民不擾以母老請歸

李春字宜春永豐人永樂進士歷官漳州知府時漳寇攻

城春堅守拒之賴以保全未幾乞休

以上縣志

歐陽和字允和泰和人永樂進士授御史居官寬厚坦亮  
太宗亟稱之曰歐陽御史真識大體陞雲南副使卒

尹崇高

通志高悞

泰和人登永樂第為南京監察御史風聲

赫然嘗按浙江等處貪暴絕跡後以事謫寧國推官

宋原端永豐人父一聰明經飭行原端奉庭訓甚嚴詩文

詞賦獨步一時尤工書法永樂登進士授監察御史勵清節肅風紀有聲臺端

按宋原端姓名各志皆同通志選舉宋作朱疑訛陳禮字正言泰和人永樂進士初釋褐試事都察院上偉其儀擢思南守既至蠻民獷暴禮為政先恩惠而後法度蠻民無敢撓首苗普亮作亂禮遣人招之弗順會鎮遠侯率師至禮挾土兵以從普亮就執放其黨民賴以安羊溪苗蠻叛禮遣諭之皆曰吾避前官虐政耳遂相率歸順郡多荒田租稅以萬計禮奏除其額以外艱去歲餘詔起除臨安府臨安蠻酋恃險剽劫禮至單騎往諭皆款服為民辯寃摘伏明決如神所歷皆有治聲上以

縣志

彭勗字祖期永豐人七歲入佛寺不拜永樂十三年舉進士親老乞近地以養除南雄府教授學舍後有祠數現光怪學官弟子率禱祀勗撤而焚之滿考補建寧教授副使王增有疾醫者許宗道誣諸生游亨魘魅以舍旁童五郎祠為徵增怒寘亨家七人重罪下近祠居民獄四百家勗抗論游氏非巫者五郎非邪神初捐地築城人也事載郡志中增愕索圖經證之大慚悔事得解建寧朱子故宅有祠無祭勗疏請春秋祭蠲子孫徭又創尊賢堂祀胡安國蔡沈真德秀諸生翕然嚮學正統元年以楊士奇薦召授御史時初設提學官命督南畿學

校詳立教條士風大振疏言國朝祠祭載在禮官修齋起梁武帝設醮起宋徽宗宜一切除之禁立庵院罷給僧尼度牒又言真定保定山東民逃鳳陽潁州以萬計皆守令匿災暴斂所致乞厚軫恤守令課績宜以戶口增耗為殿最又請設南京諸衛武學皆報可所至葺治先賢墳祠毋憂歸以孫鼎代勗起復改吏部考功郎中出為山東副使土木之變數言兵事以直不容於時致仕歸

明史

孫鼎字宜鉉廬陵人永樂間舉人歷松江教授正統八年楊溥薦為御史董南畿學政置本源錄錄諸生善行行部不令人知單輿猝至諸生謁輒閉門試之即日定甲

乙諸生試歸榜已揭通衢請託者無所措手通州旱餓奏蠲糧三千四百餘石英宗北狩鼎試罷謂諸生曰苟事當簪花宴今臣子枕戈之秋不敢陷諸君不義設茗飲步送諸門既而詣闕上書請隨所用效死不報未幾以親老致仕知府張瑄疏言鼎孝追曾閔學繼朱程宜起居論思之職帝不允天順元年卒於家

明史合彭勗傳

楊黻吉水人永樂進士授御史仁宗即位上疏言十事擢衛王府右長史盡心獻替未嘗苟取一錢宣德初卒

通志

按白志作楊黼林志人物志皆作黻字民服考科錄永樂乙未進士有楊黻無楊黼今從林志

廖謨字文績泰和人永樂進士官河間知府多惠政有古

循良風嘗任刑部主事福建僉事以明刑著稱

通志

按邑志謨子名頴重義喜施由江寧主簿陞縣丞孫佩以鄉舉官工部員外陞廣西知府

劉致隆字雲峯永新人今隸蓮花廳永樂鄉舉授浙江寧海令有循聲內艱除補四川成都令善政宜民以老致仕

廳志

周叙字公叙吉水人永樂進士選庶吉士作黃鸚鵡賦稱旨授編修歷侍讀直經筵正統八年夏上言比天旱陛下責躬虔禱而臣下不聞效忠補過之言掌銓選者罔論賢否第循資格司國計者不問耕桑惟勤賦斂軍士困役作刑罰失重輕風憲無激揚言官務緘默僧道數

萬日耗戶口流民衆多莫為矜恤帝以章示諸大臣王直等皆引罪求罷十一年遷南京侍講學士邴王監國馳疏言君父之讐不共戴天陛下宜卧薪嘗膽如越之報吳使智者獻謀勇者効力務掃北庭雪國耻先遣辯士卑詞重幣乞還鑾輿暫為君父屈因條上勵剛明規經史修軍政選賢才安民心廣言路謹微漸修庶政入事王嘉納之景泰二年又請復午朝日接大臣咨諏治道經筵之餘召文學從臣講論政事并詔天下臣民直言時政缺失帝因詔求言叙負氣節篤行誼曾祖以立

在元時以宋遼金三史體例未當欲重修叙思繼先志正統末請於朝詔許自撰銓次數年未及成而卒



劉儼字宣化吉水人正統七年進士第一歷官太常少卿  
景泰中典順天鄉試黜大學士陳循王文子幾得危禍  
天順初改掌翰林院事卒官贈禮部侍郎諡文介儼立  
朝正直居鄉亦有令德云

明史合傳

彭琉字毓敬安福人永樂進士時營建北京委琉督軍夫  
於畿內督運木於山東皆如期集大學士楊士奇薦之  
授翰林編修預纂宣德實錄出為廣東山西督學改副  
使叅贊廣西軍務引疾歸自少至老讀書不倦所著有

息庵集慎庵集備忘錄

通志

曾泉泰和人永樂十六年進士選庶吉士改御史宣德初  
都御史邵玘甄別屬察泉謫汜水典史卒正統四年河

南叅政孫原貞上言泉操行廉潔服官勤敏不以降黜  
故有偷惰心躬督民闢荒土收穀麥伐材木備營繕通  
商賈完逋責官有儲積民無科擾造舟楫置棺槨贍民  
器用百姓婚喪不給者咸資於泉死之日老幼巷哭臣  
行部汜水泉歿已三年矣民懷其惠言輒流涕雖古循  
吏何以加茲若使海內得泉等數十人分治郡邑可使  
朝廷恩澤滂流物咸得所雖在異代猶宜下詔褒美而  
獎錄未及官階未復使泉終蒙貶謫之名不獲顯於當  
世良可矜恤請追復泉爵褒既往以風方來帝從之

明史

歐陽哲字廣哲泰和人永樂進士官浙江僉事轉河南副  
使上疏言漕河利害上嘉納之賜以文綺歷官四十年

以清介著所著有雪坡集

萬節字資中安福人永樂進士官至廣西按察副使操

不苟蒞事詳審非人所易及

以上通志

劉綱字尚紀泰和人永樂中以薦舉歷知興寧通山陽城

臨海四縣正統中擢嚴州通判清操彌勵為按察使

輒所知保陞本府知府始終一節九年致仕又同里蕭

吉字仲敬與綱同起用任宣城知縣有善政

王瀘淵號靜深安福人以歲貢入太學中永樂應天鄉試

授保定新安訓導新安素未有舉者時多獲雋皆以為

教導之力旋典山東考試稱得人遷上杭訓導卒

王彥字世俊安福人永樂進士授刑部主事歷郎中左遷

雲南都司斷事用薦擢澂江知府持已廉白愛民如子

新學校興士類郡中翕然嚮化引年歸澂江士民立生

祠祀之

李毅龍泉人永樂鄉舉授廣東瓊州通判臨政不苛得黎

民心先是瓊州人汪從周司鐸龍泉毅嘗受業因以餘

俸買田築室旬朔必謁其廬人以為厚

李九疇字建用龍泉人永樂進士授湖廣道監察御史會

福建奏倭寇登岸詔選才御史督官軍勦捕廷以九疇

為可至則悉擒獮之尋監黃州金冶措置有法丁內艱

服闋改山東道陞四川叙州知府致仕

羅敏淵萬安人以貢補國子監生中永樂順天鄉試授湖

古安府志 卷四十二  
北漢陽知縣蒞官行政剛果廉潔未嘗攜妻子入官舍  
陞貴州按察司僉事

蕭常字孟韋萬安人永樂進士授御史按治東粵時有同  
列不律糾之寘於法歷任晉真以艱歸服闋命巡山左  
陞浙江叅議所至以能聲著

王貴莊字臨之安福人永樂進士官陝西道御史屢上疏  
皆切時弊尤急於薦賢末僚咸被顯擢出守雲南撫綏  
得宜興學造士未幾乞休歸

王讓字體良安福人永樂進士授廣西道監察御史按歷  
雲南土官左三梗化即劾除之邊境肅然又巡北直隸  
所至力持風裁陞福建按察司副使理冤獄決滯囚人

### 服其明

胡幾字啟先安福人永樂間讀中秘書預修大典母老請  
終養服闋授御史歷按廣右開平俱著風聲劾守將失  
機忤旨逮獄除名歸

張叔豫字順動永新人鄉薦第一永樂四年進士選庶常  
與修永樂大典出判安慶平權量禁奸蠹時進諸生講  
學坐註誤得直命督工房山溝疾卒所著有忍菴稿

江志昂永寧人永樂進士授刑部主事獄多申雪以明恕  
著聲祀鄉賢

李銓字彥庸吉水人未壯有才名永樂初以薦入京歷官  
工部有能聲丁母憂服除攝主事奉使福建所至介然

毫髮不苟取漳浦縣令懼逋責密餽以金叱去之竟發其罪狀去改通判汀州出獄囚無罪者旬日獄空藩省悉其廉敏檄督八州錢治盛暑疫作為醫藥饘粥以活貧民鑄匠小吏惡銓嚴束不便已誣構於朝就逮陳摘其情誣者服罪還銓官

周仲舉名綱以字行吉水人永樂元年偕兄述孟簡舉鄉試部使者表其所居曰三桂四年成進士賜勅獎勵加道里費俾歸進學六年召至命觀政都察院都御史言其能擢廣西道監察御史坐事降昌平縣尉訪民所不便罷十數事吏民悅令與簿皆敬服委重焉丁內艱詔有司舉賢才昌平鄆城兩縣令交章舉之猶以御史時

事改巢縣丞

楊瑒字季琛吉水人治州縣有善政永樂十九年冬太子自南京入朝過滕鄒境憫民饑饉至東平州見民皆克然意氣和悅因詢曰州有賢守乎民頌瑒治行且曰賴天子明聖知人善任守令皆悉心撫字以生活我太子嘉嘆

劉迪成字性之吉水人永樂鄉舉除邯鄲訓導進諸士函丈被服循循禮讓相先邯鄲人文蔚起署縣急撫字緩催科有不率蒲鞭示辱以勤慎奉檄入京卒於途

彭汝弼號澹軒吉水人舉永樂十八年鄉試授廣東陽春訓導改向容祁門二縣遷淮安睢寧教諭簡重方嚴教

人敦本實抑浮靡其歿也睢寧人祠祀之以子教貴封

翰林院修撰以上縣志

李信圭字君信泰和人洪熙時舉賢良授清河知縣縣瘠而衝官艘日相銜役夫動以千計前令請得沐陽五百人為助然去家遠艱於衣食信圭請免其助役代輸清河浮征三之二兩邑便之俗好發塚縱火信圭設教戒十三條令里民書於牌月朔望儆戒之且令書其民勤惰善惡以聞俗為之變宣德三年上疏言本邑地廣人稀地當衝要使節繹絡日發民挽舟丁壯既盡役及老穉妨廢農桑前年兵部有令公事急者舟予五人緩者則否今此令不行役夫無限有一舟至四五十人者凶

威所加誰敢詰問或遇快風追步不及則官舫人役沒其所齎衣糧俾受寒餒乞申明前令哀此憚人從之八年春又言自江淮達京師沿河郡縣悉令軍民挽舟若無衛軍則民夫盡出有司州縣歲發二三千人晝夜以俟而上官又不分別雜泛差役一體派及致土田荒蕪民無蓄積稍遇歉歲輒老穉相攜緣道乞食實可憫傷請自儀真抵通州盡免其雜徭俾得盡力農田兼供夫役帝亦從之自是他郡亦蒙其澤正統元年用侍郎章敞薦擢知蘄州清河民詣闕乞留命以知州理縣事民有湖田數百頃為淮安衛卒所奪民代輸租者六十年信圭奏之詔還民饑民攘食人一牛御史論死八人信

圭奏之免六人天久雨淮水大溢沒廬舍畜產甚衆信  
圭奏請賑貸并停歲辦物件及軍匠厨役濬河人夫報  
可南北往來道死不葬者信圭為三大塚瘞之十一年  
冬尚書金濂薦擢處州知府其在清河已二十二年矣  
處州方苦旱信圭至輒雨未幾卒於官清河民為立祠  
祀之

明史

按明史信圭傳後云自明興至洪宣正統間民淳俗  
富吏易為治而其時長吏亦多勵長者行以循良見  
稱其秩滿奏留者不可勝紀然其間亦有作奸判羊  
置酒邀耆老請留者自後部民奏留率下所司覈實  
併節錄附傳後

鍾復字宏彰永豐人年十五領鄉薦宣德間探花及第授  
翰林編修陞修撰兼經筵講官學識淵博文思浩瀚時  
宦者王振擅權會雷震奉天殿鴟吻詔求直言復與劉  
球相約上疏稿既就為室人所知堅持不果後球疏入  
為振所殺復曰與球共事而不得與球共死背發疽卒  
室人悔之其子同甫七齡問得其故泣曰吾當成父志  
後果以諫復皇儲杖死於獄別有傳

縣志

陳永字德清泰和人一敬子宣德中任常州府學訓導正  
統初擢河南道御史出按湖廣福建所至著能聲陞浙  
江按察僉事有平寇功

縣志

王佐字功載吉水人宣德進士選庶吉士授刑部主事歷

明庶官

四十一

員外郎中辨冤活無辜死囚百餘人奉命錄囚蘇浙多  
所平反天順間出守臨安至則撫獠彘戒軍衛以德濟  
威軍民戴之府志

羅仲本名諶泰和人宣德進士歷刑部主事郎中陞廣東  
布政司叅政景泰間驛召問考禮部試事畢督理廣東  
所屬司府衛所州縣秋糧以備征勦接濟仲本處置得  
宜軍民稱便縣志

嚴頤字士正泰和人禮孫宣德乙榜進士授江陰訓導陞  
桐城知縣理冤獄勤撫字鋤強掃苛賑饑請不俟命晉  
監察御史繩奸惡詆權貴廷臣畏之巡按四川獲反獄  
戮其魁釋脅從者百餘人松潘蠻寇梗化頤策擒其元

惡民賴以安擢叅滇南尋改廣東叅政提督邊務頤蒞  
事奉公不憚勤瘁以疾卒縣志

江玉琳字正夫永新人今隸蓮花廳宣德進士授福建道  
監察御史居官清節峻嶒彈劾不避權倖直聲大振尋  
陞廣西道按察僉事廳志

劉敷字仲文龍泉人一作安福由貢生授刑部主事讞議平允

蘇州民有訴盜茭田者久莫辨敷片時決之改廣西潯  
州府通判潯獠雜處舊文廟建城外每祭雜還褻儀  
敷更創城內祀典以肅凡獠獠近城者多方安輯以疾  
卒官

劉清字倣殷吉水人宣德進士授刑部主事歷官河南按

察司僉事晉四川副使性度寬恕用刑明慎致仕卒於家

黃瓚字宜璋吉水人宣德進士選庶吉士改南京刑部主事清白不受私謁時都御史周新董南京糧稅贖貨瓚抗章疏其罪當國者黨新誣以排陷大臣坐謫戍四川威遠衛鎮臣重其學行延以師禮久之調謫遼東上章自陳兵法為新黨所抑卒於配所

劉屋字叔載龍泉人宣德間授本學訓導時學舍傾壞屋言於上官拆民居越制者建明倫會饌二堂齋又以其餘修葺殿廡秩滿以母老致仕以上縣志

劉儁字克彥永新人宣德進士授御史陞按察僉事所至風采凜然著有木菴集通志

劉益字崇益吉水人宣德進士授兵科給事中奉勅祀西海禱雨雨隨降正統乙丑持節冊封周王所贈金帛悉却不受尋陞湖廣布政司叅議天順己卯陞國子祭酒卒於官著有覺菴集通志

張承翰字金陵吉水人宣德七年鄉舉監察御史以劾都御史周銓不法謫柳州雷塘驛丞安遠侯柳某總戎廣西以象州屢為猺獞侵擾起承翰署州事既至為立信設法揭榜撫諭猺獞解散民安生業文章薦知太平府事以母喪去官縣志叅通志

按通志據廣西名宦志訛為張金陵字承翰正統進



士今查對通志吉水志選舉並無正統進士張金陵其人而宣德七年鄉舉皆載張承翰官御史故此傳仍照縣志改正

周訓安福人宣德間以貢授香山知縣歲饑課縣民採蔬稼將秀日有巨蛙數百踏踐訓令家人椎殺之復督民盡捕羣蛙稼遂無恙海寇黃蕭以五千人掠香山城訓櫻城捍禦賊覺有備撤圍去事聞上欲屠城外民會者賊者訓兩疏言賊突至實踞民居得不屠及入覲民掩轍泣餞建祠祀之

縣志

楊季安字懷忠安福人宣德中知景陵前尹多賦民將當道為自免計邑猾復相結附擾民季安悉革去邑地卑

永樂中大水城邑傾圮季安至乃大修護城隄防水患

遂息

縣志

劉實字嘉秀安福人宣德五年舉進士居三年選庶吉士正統初授金華府通判仍歲荒旱請蠲租且贖還饑民子女義門鄭氏族大不能自給又買馬出丁供山西郵傳困甚亦以實言獲免母喪歸廬墓三載起順天府治中景泰時侍臣薦其文學召修宋元通鑑綱目實為人耿介意所不可雖達官貴人不稍遜然頗自是見同曹所纂不當輒大笑聲徹廷陛人亦以此忌之天順初還原任四年擢知南雄府商稅巨萬舊皆入守橐實無所私中官至南雄入譖言府僚叅謁留實折展之民競前

擁之出中官慚將召謝之實不往中官去至韶州聞韶人言南雄守且訟於朝矣懼馳奏誣實毀勅大不敬逮下詔獄實從獄中上書言臣官三十年未嘗以妻子自隨食麤衣敝為國家愛養小民不忍困之以是忤朝使帝覽書意稍解且釋之而實竟瘐死實苦節自持政務紛遯未嘗廢書士大夫重其學行其歿也南雄人哀而祠之孫丙自有傳

明史

劉嘉會廬陵人為武進丞有擒寇功受金帶之賚宣德中召至京授本府教授辭不堪事聽還自便

增人物表

萬齋安福人宣德進士授陽朔知縣至則令民墾土地春耕時具酒脯躬自勸勞建新學選秀民親加訓誨嫁娶

葬祭教之皆有品節民俗為之一變

通志

吳節字與儉安福人宣德進士由庶吉士官至侍讀學士已巳之變條陳十餘事皆國家大政多見采納為南祭酒督修國學廟解成降詔褒之歷任太常卿致仕年八十五卒

通志

王孟常字循溫安福人少補邑庠生邑缺學官當道命署其事同輩翕然師尊之宣德間以應貢入國學正統時授知寧陵縣時河水泛決築堤防以便民鄉人有商其地者偶得罪潛懇其子請貸孟常聞之下其子於獄任九載以疾卒於官弟璵字循性為龍巖令靖亂民清虛賦政聲赫然

蕭孟忠字不欺萬安人由薦舉授廉州佛陶巡司在交趾界偵知黎王有反謀執簡碎黎額挫辱之後獻平黎策有功加秩擢用

陳方字正觀廬陵人正統進士除行人司外艱服除奉詔禁茶臨洮西蜀等地杜絕賄賂以疾歸再徵授按察僉事典學湖廣戡除浮蔓丕變士習生平博學為詩文高古與李昌祺相先後著有直菴集

彭廣字深博安福人正統進士授刑部主事歷員外郎時有張海泉殺人捕之不得部長俞姓者素與其鄉人海泉有郤誣指之詭詞自伏廣知其冤列狀以聞上命會問午門俞屈海泉得白有旨嘉其能尋以艱歸以上縣志

劉哲安福人正統中官滁州學正奏請專勅憲臣提督學政從之陞鄭府長史王欲廢嫡立庶哲極諫不聽密疏以聞遣官勘如奏遂冊立其嫡長之賢者改哲遼府長

史參通志

鄧貴字安達吉水人正統進士授刑部主事歷陞本部郎中嘗奉命審錄辯冤獄包義之罪尋陞四川布政司叅政嘗督運漕船不傷民力蜀寇為患斬獲有功卒於官李茂字萼茂吉水人正統進士授大理寺評事陞本寺丞奉勅南京考覈官員審錄罪囚閱視兵備隄防寇盜明析允當還朝復言事八條皆救時急務陞本寺少卿卒於官祀鄉賢

劉斌安福人正統進士官兵科給事邨王監國數月間章  
凡十四上皆切時政復陳十事首言簡賢為先簡之必  
先自大臣起又謂聖學當先法古帝王窮理修身盡性  
以為治平參贊之本景帝登極謝病歸天順復辟起掌  
工科陞廣西督學僉事未幾乞罷以上縣志

路璧安福人正統進士由給事中歷福建左布政先是閩  
人貢獻供億均取八郡不計大小璧視民數為等差而  
均其役又歲徵稅價輸京師吏胥因緣為奸悉釐革之  
以病去通志

尹恕安福人正統進士歷官刑曹讞獄無冤出守澂江府  
時循行阡陌間螟不犯境捐俸新大成殿建射圃社學

焚民向化 縣志

曾相字昌輔吉水人副使昂之父也正統十二年舉於鄉  
天順元年考授南京山西道監察御史左都御史蕭維  
禎深器重之滯獄輒付讞定有士人以薦入京道金陵  
館人失盜執之法司不能辯付相按治曰此冤獄也釋  
之後卒得真盜京畿游民攬納官鐵逋負百餘萬誣逮  
繫富民當從配者數十家相力言罪平民以足逋賦非  
法乃聽諸富氓代償逋負而雪其罪在臺憲風采凜然  
縣志

梁蔡字叔車泰和人正統進士累官浙江布政使入覲恩  
賚甚隆清操粹行為時稱最滿九載卒於官著有松軒

集通志

蕭翼字體全永新人

一作永寧

正統進士知潛山縣教民種芋

以資生計改知長垣縣黃河泛溢民舍多漂沒翼身先衆役築堤捍衛發粟賑災民感其德立廟堤上祀之秩

滿遷順德知府

縣志

劉錯字用甫泰和人正統進士任刑部主事條陳十四事皆見采納歷陝西山東僉事調雲南既歸清約如貧士

通志

項棐字所勤龍泉人正統鄉舉授前軍都督府經歷蒞官

勤謹陞汝寧知府時河南大雪牛畜多死棐奏給官價買牛耕種逾年大水衝決城池屋廬復召民夫修築土

城開決水道募富戶出粟賑濟汝寧民遂無流殍

尹禮字內則永新人由進士授御史巡按山東憲紀肅振

時廷臣以征麓川冒賞禮上疏極言其弊丁艱薦起入

京條陳八事皆切時務賜勅褒嘉尋陞河南按察副使

卒

劉善慶萬安人正統進士授行人奉勅撫綏安南陞刑部

員外以讞獄矜慎不徇權貴左遷荆門州祀名宦

以上縣志

周鐸字秉訓萬安人正統進士累官廣東布政使以清慎

勤著聲所至有遺愛

通志

按邑志鐸官布政時司庫藏有鐵匝木柱數十破之皆黃白金故籍不載僚屬欲均利之鐸曰財屬庫帑

可得私耶悉聞之兩院祀名宦

劉曦字玉暉萬安人正統進士授司正立差遣法至今行

之改評事獻議明允陞雲南僉事撫綏彝人轉兩淮運

使乞休致仕祀鄉賢

縣志

左鼎字周器永新人正統進士授御史巡按山西乘輿北

狩悉心畫戰守時兵荒洊臻請蠲太原諸府稅糧停大

同轉餉夫以蘇其困也先請和抗言不可引宋景德靖

康事為鑒尋以山東河南饑遣鼎巡視民賴以安景泰

四年以災異偕同官陳救弊恤民七事末言大臣不乏

奸回宜黜罷其尤用清政本帝善其言下詔甄別吏部

尚書何文淵通政使李錫竟由是去鼎居官清勤卓有

一 聲譽御史練綱以敢言名而鼎猶善為章奏京師語曰

左鼎手練綱口英宗復位為左僉都御史踰年卒

通志

劉玘字求素安福人從兄球受春秋登正統進士授莆田

令在邑九載績滿當去民詣三司乞留者以萬計入為

刑部主事陞員外有胡指揮者因妻姦謀殺人玘論其

死罪其人素附貴幸改讞於錦衣衛坐玘故入謫戍遼

陽在遼五年日以文章自抒寫題其集曰養晦卒於戍

所參通志

曾蒙簡名廉以字行泰和人鶴齡子登正統進士為御史

有名擢福建按察僉事改湖廣遷浙江按察使所至操

履端潔政聲蔚然所著有芬菴集

縣志

楊渙字德濟泰和人正統進士知四會縣有惠政獮峒率聽約束地產斷腸草頑民多逞忿取食以死誣人渙下令訟者入其草連根以進乃與理久之其種遂絕卒庶

東僉事志 參通

羅俊字承彥泰和人正統進士任御史歷官潯州知府蠻

獠向化郡大稱治改南雄公廉寬厚有古循吏風通志

胡經字循倫安福人正統丁卯鄉舉授沔陽州訓導陞虹

縣教諭左遷蘇州司訓時鄉有鹽商行貨來蘇以事繫

官具情乞救經為白其事得釋鹽商懷白金二十斤致

謝笑而却之部檄府採漕河源委府屬之經經行視至

吳江邑宰餽以錢米經詩以却之宰疑其不腆益之固

辭而返新增

王理安福人正統進士為中書舍人擢刑科給事中戊辰

奉命冊封琉球國王歸裝不載琉球一物會北虜寇大

同王振挾上親征理力諫者再皆不報土木之難理偕

百官暴馬順屍於市邨王嗣位理與李侃同諫廢太子

事拂袖歸正統復辟御書兩朝諫議四字賜之巡蘇州

時大府議官民田出踐更錢為助理固爭事得寢以四

川叅議致仕歸新增

卷四十二終

世宗皇帝御製  
御製詩集卷之四十三  
御製詩集卷之四十三

御製詩集卷之四十三  
御製詩集卷之四十三

御製詩集卷之四十三  
御製詩集卷之四十三

[Blank page]





